


粵太記



漢書門			
九〇七六	一〇三	一〇三	一〇三
號	函	架	冊
類			


內閣文庫			
九〇七六	一〇三	一〇三	一〇三
號	冊	架	函
類			


地理

內閣文庫	
番號	漢 9076
冊數	10 (1)
函號	292: 83

自二
至三







粵大記卷之二

事紀類

武周開粵

嶺南郭棐篤周甫編

周武王既滅殷十有三年乃正九服徹法以南海地
 在東南揚州之裔定為藩服乃經九地而井牧其田
 野九八蠻之距揚越者為蠻揚十八年夏王南巡狩
 陳詩至于南海成王七年周公作周牌以測日景榮
 方述而成之言北極出地至朔方而益高南極入地
 至南海而益下十年交趾合浦西南有越裳氏者重

三譯而獻白雉周公曰德澤不加君子不饗其贄政
令不施君子不臣其人譯曰吾國之黃者曰天無烈
風淫雨海不揚波三年意者中國有聖人乎於是來
朝周公致薦于宗廟使者迷其途周公賜以駟車五
乘皆爲司南之制使者載之由扶南林邑海際蒼年
至其國二十有一年春四夷朝于成周畢貢方物蠻
楊以翟是曰王會夷王八年楚子熊渠伐楊粵勝之
自是南海叛服不常惠王六年楚成王憚布德施惠
結好於諸侯天子賜胙曰鎮爾南方夷越之亂無侵

中國於是南海臣服于楚顯王三十五年越伐楚楚
子熊商大敗之越遂散處江南海上是爲百粵自丹
陽臯鄉梅里至于嶺表皆越王子孫也秦始皇二十
五年定天下爲三十六郡郡置守尉監南越非三十
六郡之限別置南海尉以典之以屠睢爲南海郡尉
史祿爲南海郡監二十九年秦皇利粵之犀角象齒
玳瑁珠璣乃使尉屠睢發卒五十萬爲五軍一軍塞
鐔城之嶺一軍守九疑之塞一軍處番禺之都一軍
守南野之路一軍結餘干之水三年不解甲弛弩使

監祿轉餉又一軍鑿渠而通糧道以與粵人戰殺西
區君譯吁宋而粵人皆入叢薄中與禽獸處莫肯為
秦置桀駿以為將而夜攻秦人大破之殺尉睢伏尸
數十萬三十三年遣任囂趙佗擊南越平之置三郡
以任囂為南海都尉趙佗為龍川令治之是年秦使
趙佗將謫徙民五十萬人戍五嶺與越雜處三十四
年謫治獄吏有罪者處南越地三十七年始皇東巡
狩至會稽祭大禹望下南海更名大越曰山陰外越
蓋謂東甌南越也二世元年使趙佗踰五嶺安百越

佗知中國勞極使人上書求女無夫家者三萬人以
為士卒衣補始皇可其萬五千人於是百姓離心瓦
解漢高祖元年冬十二月粵將軍梅鋗帥戶將胡害
隊將搖毋餘從漢王破秦兵入關拜胡害毋餘俱為
都尉是年任囂卒佗遂代囂為尉僭據南越云

外史氏棊曰予嘗綜究粵事云在昔唐虞聲教
暨于南交時猶徃徃焚焚未得與青齊充冀森
然列也裒周武王十一年定為蠻揚此則我粵
入中國之始成王十年越裳氏重譯獻雉此則

我粵朝貢之始惠王六年王命楚子熊惲鎮南方夷越此則我粵遙治之始顯王三十五年楚子熊商伐越大敗之越遂散處江南海上此則百粵肇迹之始秦始皇二十五年以南海爲郡屠睢作尉史祿領監至三十三年以趙佗爲龍川令此又百粵列郡邑置守令所繇始也迄漢唐以來鬱然煥然稱隩區矣非武王周公開創於前孰臻茲哉予故表而出之俾知粵之開基者頌武周之功不衰而遡粵之創盛者嘉趙佗之勳不朽揆厥原本

詎容泯沫耶夫紀載貴探其根源而無取于浮濫若省志所存則猶有當商權者如康王十有八年王使人如楚昭王十有六年王師伐荆次于漢十有九年王帥師伐荆天大暄雉免皆震喪六師于漢穆王三十有八年徙戎于南土夫曰楚曰荆曰漢皆與粵無闕也而所云南土者攷之通曆言遷戎于太原徙其衆旅于南土則自太原之南而言耳奚得遙及于粵哉又如成王元年春藩服朝于閔門八年春王初蒞祚藩服來賓十有九年夏王

初巡狩藩服來朝元王二年丁卯越滅吳安王十六
年楚吳起帥師伐越夫曰來賓曰來朝皆非顯指
粵也而所云越者攷之史記越子勾踐滅吳吳夫
差自殺則自會稽之越而言耳安得濫及于粵哉
且楚澤膠舟竹書可証豈云南海之濱禹望于海
史記可稽何謂南交之境孛見紫微初無于于五
嶺星聚東井又何係于百粵乎諸如此類均當刪
之蓋國言無藉於浮華而信史最嫌於漫汎也博
覽者其尚綜核焉

尉佗稱藩

秦壹天下略定揚粵置桂林南海象郡以任囂為南
海尉二世時囂病且死召龍川令趙佗語曰秦為無
道天下苦之間陳勝等作亂天下未不知所安南海僻
遠恐盜兵侵此吾欲興兵絕新道自備待諸侯交會
疾甚且番禺負山險阻南北東西數千里頗有中國
人相輔此亦一州之主也可為國郡中長吏亡足與
言者故召公告之即被佗書行南海尉事囂死佗即
移檄告橫浦陽山湟谿閔曰盜兵且至急絕道聚兵

自守因稍以法誅秦所置吏以其黨為守假秦已滅
佗即擊并桂林象郡自立為南武王漢高帝既定天
下為天下勞苦釋佗不誅十一年使陸賈賜佗印綬
詔曰粵人之俗好相攻擊前時秦徙中縣之民南方
三部使與百粵雜處會天下誅秦南海尉佗居南方
長治之甚有文理中縣人以故不耗滅粵人相攻擊
之俗益止俱賴其力今立佗為南粵王與剖符通使
和輯百粵毋為南邊害賈至尉佗魋結箕踞見陸生
陸生說佗曰足下中國人親戚昆弟墳墓在真定今

足下反天性棄冠帶欲以區區之越與天子抗衡為
敵國禍且及身矣且夫秦失其政諸侯豪傑並起唯
漢王先入關據咸陽項羽倍約自立為西楚霸王諸
侯皆屬可謂至彊然漢王起巴蜀鞭笞天下遂誅項
羽滅之五年之間海內平定此非人力天之所建也
天子聞君王王南越不助天下誅暴逆將相欲移兵
而誅王天子憐百姓新勞苦故且休之遣臣授君王
印剖符通使君王宜郊迎北面稱臣乃欲以新造未
集之越徭彊於此漢誠聞之掘燒王先人家夷滅宗

族使一偏將將十萬衆臨越則越殺王降漢如反復
乎耳於是尉佗乃蹶然起坐謝陸生曰居蠻夷中久
殊失禮義因問陸生曰我孰與蕭何曹參韓信賢陸
生曰王似賢也復曰我孰與皇帝賢陸生曰皇帝繼
五帝三皇之業統理中國中國之人以億計地方萬
里萬物殷富政由一家自天地剖判未始有也今王
衆不過數十萬皆蠻夷崎嶇山海間譬若漢一郡耳
何乃比於漢尉佗大笑曰吾不起中國故王此使我
居中國何遽不若漢乃留陸生與欵數月曰粵中無

足與語至生來令我日間所不聞賜陸生橐中裝直
千金他送亦千金陸生卒拜尉佗為南粵王令稱臣
奉漢約歸報帝大悅拜賈為太中大夫高后四年夏
五月有司請禁南粵關市鉄器佗曰高帝立我通使
物今高后聽讒臣別異蠻夷隔絕器物此必長沙王
計欲係中國擊滅南粵而并王之自為功也五年春
佗自稱南越武帝發兵攻長沙敗數縣而去高后遣
將軍隆慮侯竈擊之會暑濕士卒大疫不能踰嶺歲
餘高后崩即罷兵趙佗因此以兵威財物賂遺閩越西

甌駱役屬焉東西萬餘里乘黃屋左纛稱制與中國
侔帝乃為佗親冢在真定者置守邑歲時奉祀召其
昆弟尊官厚賜寵之復使陸賈使南粵賜佗書曰朕
高皇帝側室之子也棄外奉北藩于代道里遼遠塗
蔽樸愚未嘗致書高皇帝棄羣臣孝惠皇帝即世高
后自臨事不幸有疾諸呂為變賴功臣之力誅之已
畢朕以王侯吏不釋之故不得不立今即位乃者聞
王遺將軍隆慮侯書求親昆弟請罷長沙兩將軍朕
以王書罷將軍博陽侯親昆弟在真定者已遣人存

問修治先人家前日聞王發兵於邊為寇災不止當
其時長沙苦之南郡尤甚雖王之國庸獨利乎必多
殺士卒傷良將吏寡人之妻孤人之子獨人父母得一
亡十朕不忍為也朕欲定地犬牙相入者以問吏吏曰
高皇帝所以介長沙土也朕不得擅變焉今得王之地
不足以為大得王之財不足以為富服嶺以南王自治
之雖然王之號為帝兩帝並立亡一乘之使以通其道
是爭也爭而不讓仁者不為也願與王分棄前惡終今
以來通使如故賈使南粵南粵王恐頓首謝罪願奉明

詔長為藩臣奉貢職於是下令國中曰吾聞兩雄不
俱立兩賢不並世漢皇帝賢天子自今以來去帝制
黃屋左纛因為書稱蠻夷大長老夫臣佗昧死再拜
上書皇帝陛下老夫故粵吏也高皇帝幸賜臣佗璽
以為南粵王孝惠皇帝即位義不忍絕所以賜老夫
者厚甚高后用事別異蠻夷出令曰毋予蠻夷外粵金
鉄田器馬牛羊即予予牡毋與牝老夫處僻馬牛羊
齒已長自以祭祀不脩有死罪使內史藩中尉高御
史平凡三輩上書謝過皆不反又風聞老夫父母墳

墓已壞削兄弟宗族已誅論吏相與議曰今內不得
振於漢外亡以自高異故更號為帝自帝其國非敢
有害於天下也高皇后聞之大怒削去南粵之籍使
使不通老夫竊疑長沙王諛臣故敢發兵以伐其邊
且南方卑溼蠻夷中西有西甌其衆半羸南面稱王
東有閩粵其衆數千人亦稱王西北有長沙其半蠻
夷亦稱三老夫故敢妄竊帝號聊以自娛老夫身定
百邑之地東西南北數千萬里帶甲百萬有餘然北
面而臣事漢何也不敢背先人之故老夫處粵四十

九年于今抱孫焉然夙興夜寐寢不安席食不甘味
目不視靡曼之色耳不聽鐘鼓之音者以不得事漢
也今陛下幸哀憐復故號通使漢如故老夫死骨不
腐改號不敢爲帝矣謹北面因使者獻白璧一雙翠
鳥千犀角十紫貝五百桂蠹一器生翠四十雙孔雀
二雙昧死再拜以聞皇帝陛下陸賈還報文帝大說
外史氏斐曰南粵乘秦之餘負山海之險塞橫
浦湟溪之口毅然與中國抗衡亦寧然桀驁哉
乃陸賈援頰於前嚴助鼓舌于後卒握其吭而

奪之柄以一使之任當十萬之師豈不恢恢壯
乎終子雲富辨鱗之識奮請纓之勇卒以粵而
舉國內屬足稱竒功顧談能耀鋒鋦而智不免
斧礪蓋說有利有不利時也彼伏波樓船二將
軍搴旂收馘拓地開疆亦竟俱麗于法何獨惜
夫終童耶子最嘉趙陀椎結匹夫耳乃能聞言
而悟嚮義而趨明於彝分以小事大有文王服
殷之誠炳於幾先變逆爲順有大易明哲之識
卒能王粵五世謂非南傲中豪傑與其後滅

也則繇椽氏外嬖少季內蒸書曰牝雞之晨詩
曰哲婦傾城自古戒之矣奚獨粵哉奚獨粵哉

漢將平南

漢武帝建元四年佗孫胡為南粵王立三年閩粵王
郢與兵南擊邊邑粵使人上書曰兩粵俱為藩臣毋
擅興兵相攻擊今東粵擅興兵侵臣臣不敢應兵唯
天子詔之於是天子多南粵義守職約為興師遣兩
將軍往討閩粵兵未踰領閩粵王弟餘善殺郢以降
於是罷兵天子使嚴助往諭意南粵王胡頓首曰天

子乃為臣興兵討閩越死無以報德遣太子嬰齊入
宿衛謂助曰國新被寇使者行矣胡方日夜裝入見
天子助還過淮南上又使助諭淮南王安以討越事
嘉答其意安謝不及助既去南越南越大臣皆諫其
王曰漢興兵誅郢亦行以驚動南越且先王昔言事
天子期無失禮要之不可以說好語入見則不得復
歸亡國之勢也於是胡稱病竟不入見元鼎四年初
南越文王遣其子嬰齊入宿衛在長安取邯鄲繆氏
女生子興文王薨嬰齊立乃藏其先武帝璽上書請

立穆氏女爲后興爲嗣漢數使使者風諭嬰齊入朝
嬰齊尚樂檀殺生自恣懼入見要用漢法比內諸侯
固稱病遂不見嬰齊薨謚曰明王太子興代立其母
爲太后太后自未爲嬰齊姬時嘗與霸陵人安國少
季通是歲上使安國少季往諭王及太后以入朝又
令諫大夫終軍使越說其王入朝比內諸侯軍自請
願受長纓羈南越王致之闕下軍遂往說越王衛尉
路博德將兵屯桂陽待使者南越王年少太后中國
人安國少季往復與私通國人頗知之多不附太后

太后恐亂起亦欲倚漢威數勸王及群臣求內屬即
因使者上書請比內諸侯三歲一朝除邊關於是天
子許之賜其丞相呂嘉銀印及內史中尉太傅印餘
得自置除其故黥劓刑用漢法比內諸侯使者皆留
填撫之五年十一月南越王王太后飭治行裝重齎
爲入朝具其相呂嘉年長矣相三王宗族仕宦爲長
吏者七十餘人男盡尚王女女盡嫁王子弟宗室及
蒼梧秦王有連其居國中甚重得衆心愈於王至是
上書數諫止王王弗聽有畔心數稱病不見漢使者

使者皆注意嘉勢未能誅王王太后亦恐嘉等先事
發欲介漢使者權謀誅嘉等乃置酒請使者大臣皆
侍坐飲嘉弟烏將將卒居宫外酒行太后謂嘉曰南
越內屬國之利也而相君苦不從者何也以激怒使
者使者狐疑相杖遂莫敢發嘉見耳目非是即起而
出太后怒欲縱嘉以矛王止太后嘉遂出介其弟兵
就舍稱病不肯見王及使者陰與大臣謀作亂王素
無意誅嘉嘉知之以故數月不發天子聞嘉不聽命
王王太后孤弱不能制使者怯無決又以爲王王太

后已附漢獨呂嘉爲亂不足以興兵欲使往參以二
千人往使參曰以好往數人足矣以武往二千人無
足以爲也辭不可天子罷參却壯士故濟北相韓千
秋奮曰以區區之越又有王王太后應獨相呂嘉爲
害願得勇士三百人必斬嘉以報於是天子遣千秋
與王太后弟膠樂將二千人往入越境呂嘉等乃遂
及下令國中曰王年少太后中國人也又與使者亂
專欲內屬盡持先王寶器入獻天子以自媚多從人
行至長安虜賣以爲僮僕取自脫一時之利無顧趙

氏社稷爲萬世慮計之意乃與其弟將卒攻殺王王
太后及漢使者遣人告蒼梧秦王及其諸郡縣立明
王長男越妻子術陽侯建德爲王而韓千秋兵入破
數小邑其後越直開道給食未至番禺四千里越以
兵擊千秋等遂滅之使人函封漢使者節置塞上好
爲謾辭謝罪發兵守要害處春三月壬午天子聞南
越反曰韓千秋雖無功亦軍鋒之冠封其子延年爲
成侯膠樂姊爲王太后首願屬漢封其子廣德爲龍
亢侯秋遣伏波將軍路博德出桂陽下湟水樓船將
軍楊僕出豫章下湏水歸義越侯嚴爲戈船將軍出
零陵下離水甲爲下瀨將軍下蒼梧省將罪人江淮
以南樓船十萬人越馳義侯遣別將巴蜀罪人發夜
郎兵下牂牁江咸會番禺齊相卜式上書請父子與
齊習船者往死南越天子下詔褒美式賜爵關內侯
金六十斤田十頃布告天下天下莫應是時列侯以
百數皆莫求從軍擊越會九月嘗酎祭宗廟列侯以
令獻金助祭少府省金金有輕及色惡者上皆令劾
以不敬奪爵者百六人六年冬樓船將軍楊僕入越

地先陷尋陘破石門挫越鋒以數萬人待伏波將軍
路博德至俱進樓船居前至番禺南越王建德相呂
嘉城守樓船居東南面伏波居西北面會暮樓船攻
敗越人縱火烧城伏波為營遣使者招降者賜印綬
復縱令相招樓船力攻燒敵驅而入伏波營中黎旦
城中皆降建德嘉已夜亡入海伏波遣人追之校尉
司馬蘇弘得建德越郎都稽得嘉戈船下瀨將軍兵
及馳義侯所發夜郎兵未下南越已平矣遂以其地
為南海蒼梧鬱林合浦交趾九真日南珠厓儋耳九
郡師還上益封伏波封樓船為將梁侯蘇弘為海常
侯都稽為臨蒸侯及越降將蒼梧王趙光等四人皆
為侯

外史氏集曰漢武帝興兵擊東越以安南越德
之洽於南越也甚厚而少季滯亂呂嘉昏繆不
克仰承德意且擊滅韓千秋等兵於是遣伏波
樓船諸將軍率師南下踰年而耆定之分其地
為九郡乃百粵始屬中國收圖以迄于今則伏
波樓船之宏烈也當遣千秋時淮南王安上言

曰臣聞越甲卒不下數十萬所以入之五倍乃足輓車奉餉者不在其中南方暑濕近夏瘴熱暴露水居蠃蛇蝨生疾疢多作未血刃而病死者十二三雖舉越國而虜之不足以償所失臣聞長老言秦之時嘗使尉屠睢擊越又使監祿鑿渠通道越人逃入深山棘叢不可歸攻留軍屯守空地曠日持久當此之時內外騷動民不聊生群為盜賊於是山東之難始興且天子之兵有征無戰言莫敢校也如使越人蒙傲倖以逆執事之顏行廝與之卒有不備而歸者雖得越王之首猶為大漢羞之其後韓千秋等兵為呂嘉所擊滅而使者皆遇害則安之言非過也是役也予獨惜終軍以妙齡奉使死於其職通志未及表章之豈勸忠之義乎予故別為之傳庶覽者知其志焉

盧循寇廣

晉安帝隆安二年初琅邪人孫泰學妖術於錢唐杜子恭士民多奉之王珣惡之流泰於廣州王雅薦泰

於孝武帝云知養性之方召還累官至新安太守泰
知晉祚將終因王恭之亂以討恭為名收合兵衆聚
貨鉅億三吳之人多從之識者皆憂其為亂以中領
軍元顥與之善無敢言者會討孫恩劉牢之亦發兵
討恩拜表輒行元興元年春三月孫恩寇臨海臨海
太守辛景擊破之恩所虜三吳士女死亡殆盡恩恐
為官軍所獲乃赴海死其黨及妓妾從死者以百數
謂之水僊餘衆數千人復推恩妹夫盧循為主循謀
之曾孫也神采清秀雅有材藝少時沙門惠遠嘗謂

之曰君雖體涉風素而志存不軌如何太尉玄欲撫
安東土乃以循為永嘉太守循雖受命而寇暴不已
夏五月盧循自臨海入東陽太尉栢玄遣撫軍中兵
參軍劉裕將兵擊之循敗走二年春正月至秋八月
劉裕屢破盧循循浮海南走三年盧循寇南海攻番
禺廣州刺史濮陽吳隱之拒守百餘日冬十月壬戌
循夜襲城而陷之燒府舍民室俱盡執吳隱之循自
稱平南將軍攝廣州事聚燒骨為大冢葬於洲上得
髑髏三萬餘枚又使徐道覆攻始興執始興相阮腆

之義熙元年盧循遣使貢獻時朝廷新定未暇征討
權以循為廣州刺史徐道覆為始興相循遣劉裕益
智綜裕報以續命湯循以前琅邪內史王誕為平南
長史誕說循曰誕本非戎旅在此無用素為劉鎮軍
所厚若得北歸必蒙寄任公私際會仰答厚恩循甚
然之劉裕與循書令遣吳隱之還循不從誕復說循
曰將軍今留吳公公私非便孫伯符豈不欲留華子
魚邪但以一境不容二君耳於是循遣隱之與誕俱
還六年初徐道覆聞劉裕北伐勸盧循乘虛襲建康
循不從道覆自至番禺說循曰本住嶺外豈以理極
於此傳之子孫邪正以劉裕難與為敵故也今裕頓
兵堅城之下未有還期我以此思歸死士掩擊何劉
之徒如反掌耳不乘此機而苟求一日之安朝廷常
以君為腹心之疾若裕平齊之後息甲歲餘以璽書
徵君裕自將屯豫章遣諸將校帥銳師度庾嶺雖復
以將軍之神武恐必不能當也今日之機萬不可失
若先克建康傾其根蒂裕雖南還無能為也君若不
同便當帥始興之衆直指尋陽循甚不樂此舉而無

以奪其計乃從之初道覆使人伐船材於南康山至始興賤賣之居人爭市之船材大積而人不疑至是悉取以裝艦旬日而辦循自始興寇長沙道覆寇南康廬陵豫章諸守相皆委任奔走道覆順流而下舟楫甚盛劉裕至下邳以船載輜重自帥精銳步歸至山陽聞何無忌敗死慮京邑失守卷甲兼行與數千人至淮山問行人以朝廷消息行人曰賊尚未至劉公若還便無所憂裕大喜將濟江風急甚咸難之裕曰若天命助國風當自息若其不然覆溺何害即命

登舟舟移而風止過江至京口衆乃太安夏四月癸未裕至建康以江州覆沒表送章綬詔不許青州刺史諸葛長民兗州刺史劉藩并州刺史劉道憐各將兵入衛建康藩豫州刺史毅之從弟也秋七月庚申循自蔡洲南還潯陽留其黨范崇民將五千人據南陵甲子裕使輔國將軍王仲德廣川太守劉鍾河間內史蘭陵蒯恩中軍諮議參軍孟懷玉等帥衆追隨八月劉裕還東府大治水軍遣建威將軍會稽孫處振武將軍沈田子帥衆三千自海道襲番禺田子林

子之兄也衆皆以為海道艱遠必至為難且分徹見力非目前之急裕不從敕處曰大軍十二月之交必破妖虜卿至時先傾其巢窟使彼走無所歸也江州刺史庾悅以盧循兵守廣州者不以海道為虞庾成孫處乘海奄至會大霧四面攻之即日拔其城處撫其舊民戮循親黨勒兵謹守分遣沈田子等擊嶺表諸郡劉裕軍雷池盧循揚聲不攻雷池當乘流徑下裕知其款戰十二月己卯進軍大雷庚辰盧循徐道覆帥衆數萬塞江而下前後莫見舳艫之際裕悉出

輕艦帥衆軍齊力擊之又分步騎屯於西岸先備火具裕以勁弩射循軍因風水之勢以蹙之循艦悉泊西岸岸上軍投火焚之烟焰漲天循兵大敗走還尋陽將趣豫章乃悉力柵斷左里丙申裕軍至左里不得進裕麾兵將戰所執麾竿折幡沈于水衆並怪懼裕笑曰往年覆舟之戰幡竿亦折今者復然賊必破矣即攻柵而進循兵雖殊死戰弗能禁循單舸走所殺及投水死者凡萬餘人納其降附宥其逼畧遣劉藩孟懷玉輕軍追之循收散卒尚有數千人徑還番

禹道覆走保始興裕板建威將軍褚裕之行廣州刺
史裕之裒之曾孫也裕還建康劉毅惡劉穆之每從
容與裕言穆之權太重裕益親任之七年春正月劉
藩帥孟懷玉等諸將追盧循至嶺表二月壬午懷玉
克始興斬徐道覆三月盧循行收兵至番禺遂圍之
孫處拒守二十餘日沈田子言於劉藩曰番禺城雖
險阻本賊之巢穴今循圍之或有內變且孫季高衆
力寡弱不能持久若使賊還據廣州凶虓復振矣夏
四月田子引兵救番禺擊循破之所殺萬餘人循走

田子與處共追之又破循於蒼梧鬱林寧浦會處病
不能進循奔交州初九真太守李遜作亂交州刺史
交趾杜瑗討斬之瑗卒朝廷以其子慧度為交州刺
史詔書未至循襲破合浦徑向交州慧度帥州府文
武拒循於石碕破之循餘衆猶三千人李遜餘黨李
脫等結集俚僚三千餘人以應循庚子循晨至龍編
南津慧度悉散家財以賞軍士與循合戰擲雉尾炬
焚其艦以步兵夾岸射之循衆艦俱燃兵遂大潰循
知不免先鳩妻子召妓妾問曰誰能從我死者多云

雀鼠貪生就死實難或云官尚當死某豈願生乃悉
殺諸辭死者因自投于水慧度取其尸斬之并其父
子及李晚等函首送建康

外史氏集曰盧循呂么麼之姿徂於狹龍之兆
遂建旗揭竿橫行於海島中誠溟渤之鯨鯢而
負嵎之豺虎也綱目於元興三年冬十月書盧
循陷番禺徐道覆陷始興名循之為亂賊也義
熙七年夏四月書盧循寇番禺不克走交州刺
史杜慧度擊斬之考異謂當作討循誅之正其

為亂賊也夫循之為賊昭昭矣通志於事紀元
興三年冬十月書海賊盧循攻廣州刺史隱之
與戰敗績壬戌大火城陷循獲隱之自攝州事
此固著循亂之始而於義熙六年始書盧循反
何其討惡之恕乎其自元興三年之冬以及義
熙六年之春中間僭據七年之久孰非反之之
日乎且又於廣州刺史題名于吳隱之後繼以
盧循何其薰蕕並列而名噐倒置乎諸如此類
皆當刪正不然何以寒亂臣賊子之膽而正萬

古之綱常哉

蕭勃據粵

梁武帝太清三年西江督護陳霸先欲起兵討侯景
景使人誘廣州刺史元景仲許奉以為主景仲由是
附景陰圖霸先霸先知之與成州刺史王懷明等集
兵南海馳檄以討景仲曰元景仲與賊合從朝廷遣
曲陽侯蕭勃為刺史軍屯頓朝亭景仲所部聞之皆
棄景仲而散秋七月甲寅景仲縊於閣下霸先迎定
州刺史蕭勃鎮廣州前高州刺史蘭裕欽之弟也與

其諸弟扇誘始興等十郡攻監衡州事歐陽頔勃使
霸先救之悉擒裕等勃因以霸先監始興郡事冬十
二月始興太守陳霸先結郡中豪傑欲討侯景郡人
侯安都張偲等各帥衆千餘人歸之霸先遣主帥杜
僧明將二千人頓於嶺上廣州刺史蕭勃遣人止之
曰侯景驍雄天下無敵前者援軍十萬士馬精彊猶
不能克君以區區之衆將何所之如聞嶺北王侯又
皆鼎沸親尋干戈以君疎外詎可暗投未若且留始
興遙張聲勢保太山之安也霸先曰僕荷國恩往聞

度景度江即欲赴援遭值元蘭梗我中道今京都覆
沒君辱臣死誰敢愛命君侯體則皇枝任重方岳遣
僕一軍猶賢乎已乃更止之乎乃遣使問道詣江陵
受湘東王繹節度時南康土豪蔡路養起兵據郡勃
乃以腹心譚世遠為曲江令與路養相結同遏霸先
簡文帝大寶元年春正月陳霸先發始興至大庾嶺
蔡路養將二萬人軍於南野以拒之路養妻姪蘭陵
蕭摩訶年十三單騎出戰無敢當者杜僧明馬被傷
陳霸先救之授以所乘馬僧明上馬復戰衆軍因而

乘之路養大敗脫身走元帝承聖三年廣州刺史曲
江侯勃自以非上所授內不自安上亦疑之勃啟求
入朝五月乙巳上以王琳為廣州刺史勃為晉州刺
史秋九月曲江侯勃遷居始興陳高祖永定元年初
梁世祖以始興郡為東衡州以歐陽顓為刺史久之
徙顓為郢州刺史蕭勃番顓不遣世祖以王琳代勃
為廣州刺史勃遣其將孫盪監廣州盡帥所部屯始
興以避之顓別據一城不往謁閉門自守勃怒遣兵
襲之盡收其資財馬仗尋赦之使復其所與之結盟

江陵陷，頽遂事勃。二月庚午，勃起兵於廣州，遣頽及其將傅泰、蕭孜為前軍，孜勃之從子也。南江州刺史余孝頃以兵會之。詔平西將軍周文育帥諸軍討之。歐陽頽等出南康，頽屯豫章之苦竹灘，傅泰據蹠口。城余孝頃遣其弟孝勤守郡城，自出豫章，據石頭巴山。太守熊曇朗誘頽共襲高州刺史黃灋，灋又語灋。灋約共破頽，且曰：「事捷與我馬仗，遂出軍與頽俱進。」至灋，灋城下，曇朗陽敗走灋，灋乘之。頽失援而走，曇朗取其馬仗歸于巴山。周文育軍少舡，余孝頃有舡。

在上牢。文育遣主焦僧度襲之，盡取以歸。仍於豫章立柵，軍中食盡，諸將欲退。文育不許，使人間行遺衡州刺史周迪書約為兄弟。迪得書甚喜，許饋以糧。於是文育分遣老弱乘舡，泐流俱下，燒豫章柵。偽若遁去者，孝頃望之大喜，不復設備。文育由間道兼行，據芋韶。芋韶上流則歐陽頽，蕭孜下流則傅泰。余孝頃營文育，據其中間築城。饗士，頽等大駭。頽退入泥溪。文育遣嚴威將軍周鐵虎等襲頽。癸巳，擒之。文育盛陳兵甲，與頽乘舟而宴，巡蹠口。城下使其將下。

灋洪攻秦擒之攻孝頃退走三月庚子周文育送歐陽
陽額傳秦于建康丞相霸先與額有舊釋而厚待之
曲江侯勃在南康聞歐陽額等敗軍中恐懼甲寅德
州刺史陳灋武前衡州刺史譚世遠攻勃殺之夏四
月故曲江侯勃主帥闌鼓襲殺譚世遠軍主夏侯明
徹殺鼓持勃首降勃故記室李寶藏奉懷安侯任據
廣州蕭孜余孝頃猶據石頭為兩城各居其一多設
舡艦夾水而陳丞相霸先遣平南將軍侯安都助周
文育擊之戊戌安都潛師夜燒其舡艦文育帥水軍
安都帥步騎進攻之蕭孜出降孝頃逃歸新吳文育
等引兵還丞相霸先以歐陽額聲著南土復以額為
衡州刺史使討嶺南未至其子紇已克始興額至嶺
南諸郡皆降遂克廣州五月戊辰余孝頃遣使詣丞
相府乞降嶺南悉平

外史氏裴曰蕭勃之刺廣州霸先之力也及霸
先起兵討侯景其義甚正勃陰令蔡路養譚世
遠遏止之怨隙始開噬齊何及乎綱目書梁始
興太守陳霸先起兵討侯景予之也書法謂侯景

之變梁之臣子能盡討賊之義者霸先一人而已觀于霸先之功則勅之罪其容揜乎然則勅之起兵廣州不書及周文育之擊勅不書討勅為其下所殺不書誅何也蓋霸先書自為丞相錄尚書事之後則與前討侯景之心相矛盾矣烏容復予以討亂之義哉此又綱目之權衡也

黃巢僭亂

唐禧宗乾符元年濮州人王仙芝聚眾數千起於長垣二年夏六月王仙芝及其黨以君長攻陷濮州曹

州衆至數萬天平節度使薛崇出兵擊之為仙芝所敗寃句人黃巢亦聚眾數千人應仙芝巢少與仙芝皆以販私塩為事巢善騎射喜任俠粗涉書傳屢舉進士不第遂為盜與仙芝攻剽州縣橫行山東民之困於重斂者爭歸之數月之間衆至數萬群盜侵淫剽掠十餘州至于淮南多者千餘人少者數百人詔淮南忠武宣武義成天平五軍節度使各監軍亟加討捕五年正月以曾元裕為招討使元裕大破王仙芝於黃梅殺五萬餘人追斬仙芝傳首餘黨散去黃

巢方攻汝州未下尚讓帥仙芝餘衆歸之推巢為王
號衝天大將軍改元王霸六年五月黃巢與浙東觀
察使崔瑒嶺南東道節度使李迢書求天平節度使
二人為之奏聞朝廷不許巢復上表求廣州節度使
上命大臣議之左僕射于琮以為廣州市舶寶貨所
聚豈可令賊得之亦不許乃議別除官六月宰相請
除巢率府率從之秋九月黃巢得率府率告身大怒
詬執政急攻廣州即日陷之執節度使李迢轉掠嶺
南州縣巢使迢草表述其所懷迢曰予代受國恩親

戚滿朝腕可斷表不可草巢殺之黃巢在嶺南士卒
罹瘴疫死者什三四其徒勸之壯還以圖大事巢從
之自桂州編大筏數千乘暴水沿湘江而下歷衡永
州十月癸未抵潭州城下李係嬰城不敢出戰巢急
攻一日陷之係犇朗州巢盡殺戍兵流尸蔽江而下
尚讓乘勝進逼江陵衆號五十萬廣明元年十二月
庚寅黃巢入長安殺唐宗室無遺類辛卯巢始入宮
壬辰巢即皇帝位于含元殿畫皁繒為衮衣擊戰鼓
數百以代金石之樂登丹鳳樓下赦書國號大齊改

元金統謂廣明之號去唐下體而著黃家日月以為
已符瑞唐官三品已上悉停任四品以下位如故以
妻曹氏為皇后以尚讓為太尉兼中書令趙璋兼侍
中崔瑒楊希古竝同平章事孟楷蓋洪為左右僕射
知左右軍事費傳古為樞密使以太常博士皮日休
為翰林學士四年春正月黃巢兵尚疆周岷時溥朱
全忠不能支共求救於河東節度使李克用二月克
用將蕃漢兵五萬出天井關河陽節度使諸葛爽辭
以河橋不全屯兵萬善以拒之克用乃還兵自陝河

中度河而東三月朱全忠擊黃巢瓦子寨拔之巢將
陝人李唐賓楚丘王虔裕降于全忠黃巢圍陳州幾
三百日趙犢兄弟與之大小數百戰雖兵食將盡而
衆心益固李克用會許汴徐克之軍于陳州時尚讓
屯太康夏四月癸巳諸軍進拔太康黃思鄴屯西華
諸軍復攻之思鄴走黃巢聞之懼退軍故陽里陳州
圍始解朱全忠聞巢將至引軍還大梁五月癸亥大
雨平地三尺黃巢營為水所漂且聞李克用至遂引
兵東北趣汴州屠尉氏尚讓以驍騎五千進逼大梁

至于繁臺宣武將豐人朱珍南華龐師古擊却之全
忠復告急於李克用丙寅克用與忠武都監使田從
異發許州戊辰追及黃巢於中牟北王滿渡乘其半
濟奮擊大破之殺萬餘人賊遂潰尚讓帥其衆降時
溥別將臨晉李謹曲周霍存甄城葛從周寃句張歸
霸及從弟歸厚帥其衆降朱全忠巢踰汴而比已已
克用追擊之於封丘又破之庚午夜復大雨賊驚懼東
走克用追之過胙城匡城敗之餘衆近千人東奔兗
州辛未克用追至寃句騎能屬者纔數百人晝夜行
二百餘里人馬疲乏糧盡乃還汴州欲裹糧復追之
獲巢幼子及乘輿器服符印得所掠男女萬人悉縱
遣之庚辰時溥遣其將李師悅將兵萬人追黃巢六
月甲辰武寧將李師悅與尚讓追黃巢至瑕丘敗之
巢衆殆盡走至狼虎谷丙午巢甥林言斬巢兄弟妻
子首將詣時溥遇沙陀博野軍奪之并斬言首以獻
于溥秋七月壬午時溥遣使獻黃巢及家人首并姬
妾上御大玄樓受之宣問姬妾汝曹皆勳貴子女世
受國恩何為從賊其居首者對曰狂賊凶逆國家以

百萬之衆失守宗祧播遷巴蜀今陛下以不能拒賊
過責一女子置公卿將相於何地乎上不復問皆戮
之於市人爭與之酒其餘皆悲怖昏醉居首者獨不
飲不泣至於就刑神色肅然上以長安宮室焚毀
故又留蜀未歸王徽知京兆尹事招撫流散戶口稍
歸復繕治宮室百司粗有條緒十月關東藩鎮表請
車駕還京師十二月鳳翔節度使李昌言病表弟昌
符知留後昌言薨制以昌符為鳳翔節度使時黃巢
雖平秦宗權復熾命將出兵寇掠隣道陳彥侵淮南

秦賢侵江南秦誥陷襄唐鄧孫儒陷東都孟陝號張
晔陷汝鄭盧塘攻汴宋所至屠翦焚蕩殆無孑遺其
殘暴又甚於巢軍行未始轉糧車載監尸以從北至
衛滑西及關輔東盡青齊南出江淮州鎮存者僅保
一城極目千里無復煙火上將還長安畏宗權為患
光啓元年春正月戊午下詔招撫之己卯車駕發成
都陳敬瑄送至漢州而還二月丙申至鳳翔三月丁
卯至京師荆棘滿城狐兔縱橫上淒然不樂己巳赦
天下改元時朝廷號令所在惟河西山南劍南嶺南

數十州而已

外史氏集曰黃巢盭監耳藉王仙芝之餘焰橫行江淮弄兵楚粵揚戈入廣州如履無人之境復僭據長安黃屋左纛稱號大齊改元金統何其暴也非李克用數挫其鋒則時溥何繇坐收其勝然則克用於唐有再造之力洵元功哉綱目於僖宗中和二年冬書李克用將沙陀趣河中嘉其赴義之勇三年春書破尚讓於華州五月書李克用破黃巢收復長安予其恢復之績蓋

比於郭汾陽恢復兩京深嘉之也然攷之黃巢於乾符六年陷廣州執節度使李迢使代草表迢堅不從遇害良可謂不貳心之臣矣綱目畧而不書何以勸忠乎竊謂於巢陷廣州之下當書節度李迢死之以著其節庶以教萬世之為人臣者嗚呼盧循陷廣州吳隱之以不屈被監黃巢陷廣州李迢以不草表而死若二公者其足為廣州增光焰萬丈哉

宋師南伐

宋太祖開寶三年遣將潘美尹崇珂帥師伐銀鉉遣
宦者龔澄樞等禦之秋九月宋師克富州斬銀將伍
彥柔澄樞遁按通鑑先是宋主令南唐主為書諭銀
鉉不悛唐主上其書宋主乃以潘美為桂州道行營
都部署尹崇珂為副以伐之時南漢舊將多以讒構
誅死宗室剪滅殆盡掌兵者惟宦官數輩自南漢主
晟以來耽於遊宴城壁濠隍多飾為宮館池沼樓艦
皆毀兵器又腐及聞有宋師內外震恐乃遣龔澄樞
馳往賀州畫守禦策宋前鋒至芳林澄樞遁還宋遂

圍賀州南漢諸文臣皆請起故將潘崇徹南漢主不
從遣伍彥柔將兵援賀潘美聞彥柔至潛以奇兵伏
南鄉岸彥柔夜泊南鄉艤舟岸側遲明挾彈登岸踞
胡床指揮而宋伏兵卒起彥柔衆大亂死者十七八
擒彥柔斬之梟其首以示城中城遂破降宋師既克
賀州美等次昭州破開建砦殺卒數百擒砦將斬暉
昭州刺史田行稠遁去城遂陷桂州刺史李承進棄
城而奔冬十二月宋師克連州鉉所署招討使盧收
退保清遠自固美督戰艦聲言順流趨廣州南漢主

憂迫計無所出乃以潘崇徹為都統領衆三萬屯賀
江會美徑趨昭州崇徹但擁衆自保而已美乘勝克
昭州進拔桂連二州南漢主聞之謂左右曰昭桂連
賀本屬湖南今北師取之足矣吾知不復南也鉉將
李承渥帥師拒宋潘美進擊大敗之遂克韶州是時
南漢主以李承渥為都統將兵十餘萬陣于蓮花峰
下南漢人教象為陣每象載十數人皆執兵仗凡戰
必致陣前以壯軍威潘美集勁弩射之象奔蹏乘者
皆墜反踐承渥軍軍遂大敗承渥僅以身免美進拔

韶州韶漢之北門也鉉聞韶破窮蹙不知為計始令
塹廣州東城顧諸將無可使者宮媪梁鸞真薦其養
子郭崇岳可用南漢主以為招討使與大將植廷曉
統軍六萬屯馬逕以禦宋師崇岳無謀勇唯日禱于
鬼神而已是月宋以董樞知連州兼行營招撫使以曹光實
為嶺南都巡檢使樞偕光實既至捕逐群盜海隅以寧
開寶四年春正月克英雄二州鉉將潘崇徹降按潘
崇徹廣州南海人事龔為內侍省局丞頗讀兵書立
戰功晟嘗遣大將吳懷恩伐桂州平之懷恩為部下

所殺命崇徹代之。鍤襲位加西北面都統。歲餘。鍤頰疑崇徹遣薛崇譽使其軍以察之。崇譽還白崇徹以伶人百餘衣錦繡吹玉笛為長夜之飲。不恤軍政。鍤怒召歸奪其兵柄。自是居常怏怏。太祖命師度嶺。鍤復命崇徹領兵五萬戍賀江。崇徹不為効命。且素無智謀。徒擁大衆。紀律蕩然。以致宋師乘勝直次于瀧頭。鍤遣使求緩師。美不許。瀧頭山水險惡。美等疑有伏兵。乃挾鍤使速度。諸險美進馬。逕去廣城十里。砦于雙女山下。漢主聞之。取船舶十餘載金寶妃嬪。欲入海。未及發。宦者樂範與衛兵千餘盜船舶走。漢主懼遣其左僕射蕭淮奉表詣軍門乞降。美即令人送淮赴汴。漢主欲遣其弟保興率百官出迎。郭崇嶽止之。乃復為扞禦之備。又遣保興率國內兵拒宋。植廷曉謂崇嶽曰。北軍乘席卷之勢。其鋒不可當。吾軍旅雖衆。然皆傷疲之餘。今不驅策而前。亦坐受其斃矣。廷曉乃領前軍據水而陣。令崇嶽殿後。既而宋師濟水。廷曉力戰不勝。死于陣。崇嶽奔還。其柵潘美謂諸將曰。彼編竹木為柵。若用火焚之。必擾亂。因而

夾攻之此萬全之策也遂分遣丁夫人持二炬間道
造其柵會暮夜萬炬俱發天大風煙埃紛起南漢軍
大敗崇嶽死于亂兵龔澄樞李托相與謀曰北軍之
來利吾國中珍寶爾今盡焚之使得空城必不能久
駐也乃縱火焚府庫宮殿一夕皆盡明日銀出降美
入城擒銀及龔澄樞李托薛宗譽與宗室文武九十
七人同縶於龍德宮保興逃於民家亦獲之悉部送
闕下斬闔工五百餘人凡得州六十縣二百四十戶
十七萬銀至江陵邸吏龐師進迎謁學士黃德昭侍

銀問師進何人德昭曰本國人也銀曰何為在此曰
先主進貢大朝輜重比至荊州乃令師進至邸于此
造車以給饋運爾銀嘆曰我在位十四年未嘗聞此
言今日始知祖宗山河及大朝境土也因泣下久之
宋文鑑嶺南道行營擒劉銀露布嶺南道行營都部
署潘美副部署尹崇珂都監朱憲等上尚書兵部臣
等聞飛霜激電上帝所以宣威伐罪弔民明王以之
耀武我國家仰稽玄象大啓洪基將復三代之土疆
永泰萬方之生聚西平巴蜀雲雷敷潤物之恩南定

衡湘江漢鼓朝宗之浪惟嶺外之獮俗獨恃遠以偷
安久背照臨罔遵聲教偽漢國主劉鋹性惟克惡識
本庸愚以霄害為化風以誅戮為政事置火床鐵刷
之獄人不聊生設剉碓湯鑊之刑古未嘗有恨刀鋒
之不快用鋸解以恣情鬻割割屠窮彼殘害一境籲
天而無路生民何地以稱寃衆心望明如望皎日我
皇帝仁深恤隱義切救焚遂發干戈拯其塗炭臣等
上憑神武遙稟睿謀舉軍未及於半年乘勝連平於
數郡累逢戰陣無不掃除劉鋹遠懼傾危尋差人使

初則稱臣上表具陳歸化之心後乃設詐藏奸翻作
款兵之計臣與將士等仰承睿旨不敢逗遛於正月
二十七日已到柵口去廣州只及一程劉鋹又頻發
佐僚來往商議漸無憑準固欲淹留兼於諸處收到
新出偽命文榜皆是會合逆黨以拒王師至二月四
日果遣其弟偽禎王保興等部領舉國軍兵併來決
戰臣等憤其翻覆惡此狂迷尋結戰以交鋒復揮戈
而誓衆行營將士等感天君之撫御咸願竭忠怒逆
黨之拒張爭先効命八十里鎗旗競進數萬人殺戮

無遺尋又分布師徒徑收賊壘其劉鋹知城隍之必
陷將府庫以自焚烈焰連天更甚昆岡之火投戈散
地正同牧野之誅劉鋹則尋即生擒廣州則當時平
定其在州官吏僧道軍人百姓等乍除苛虐咸遂生
全無不感帝力以沾襟望皇都而稽首此蓋天威遠
被宸筭遐敷平七十年不道之邦救百萬戶倒懸之
命殊方既久長承日月之光鴻祚無疆永荷乾坤
之祐謹奉露布以聞時宦者百餘盛服請見美
曰是極人多矣吾奉詔伐罪正為此等悉斬之辛卯
大赦廣南有買人男女為奴婢轉傭利者並放免偽
政有害于民者具以聞除之丁酉賞平廣南功命潘
美尹崇珂知廣州尋蕪市舶使夏六月潘美俘鋹至京師
宋主御明德門遣刑部尚書盧多遜宣詔責鋹對曰臣年
十六僭位澄樞等皆先臣舊人每事臣不得專伏地待罪
宋主命大理卿高繼申引澄樞托斬于千秋門外釋鋹罪
賜襲衣冠帶器幣鞍馬授檢校太保右千牛衛大將
軍封恩赦侯錕體質豐碩眉目俱竦有口辯性絕巧
嘗以珠結鞍勒為戲龍之狀極其精妙以獻宋主謂

左右曰錶好工巧習以成性儻能移於治國豈至戚
亡哉秋八月錶所署府尹鄧存忠及韶州土豪周思
瓊舉兵攻邕州守將范旻屢出親戰矢集於胸猶殊
死戰賊遂少却會潘美等遣廣州救兵至圍解賜璽
書獎之旻宰相質之子也

外史氏禁曰五嶺僻在一隅劉巖父子僭據二
世自此於尉佗然錶荒淫不灑醜殺無忌視佗
霄壤懸絕矣潘美師出庾閩龔澄樞伍彥柔潘
崇徹郭崇徽等奮其螳臂以當車轍而美也

堂之陣耀武而不殺第誅宦監百餘群小肅然
收輿圖於掌上納民物於懷中上宣宋祖曠蕩
之仁下慰廣民悵懍之庇即曹彬之下江南豈
多讓哉宋主首除竒政錄用漢官仁厚之澤洽
于海隅迨其後也航海艱關之際官民駢首就
斃不貳厥心詎非忠厚立國之報乎備書于冊
觀者尚深長思焉

狄青討叛

皇祐元年秋九月乙巳太白犯南斗廣源州蠻儂智

高反寇邕州初儂氏自唐初為峒蠻及智高欲請內屬
不得乃與廣州進士黃瑋黃師宓及其黨儂遣侯儂
志忠等日夜謀入寇一夕焚其巢穴給其衆曰平生
積聚今為天火焚無以為生計窮矣當拔邕州據廣
州以自王否則共死耳四年春三月儂智高圍康州
知州趙師旦死之夏五月儂智高圍廣州初仲簡知廣
州儂智高犯邕州沿江而下人告急簡輒囚之仍榜
于道敢妄言惑衆者斬以是人不復為避賊計聞智
高至始令人入城民爭道競以金帛遺閤者相蹂踐

至死者甚多其不得入者皆附賊賊既去以其能守
城徙知荆南夏六月遣楊旼會廣桂兵討智高前尚
書屯田員外郎直史館楊旼體量安撫廣南提舉經
制盜賊事庚辰改余靖為廣西安撫使知桂州命同
提點廣東刑獄李樞與陳曙討智高廣東轉運鈐轄
同發兵援之尋命余靖經制廣南盜賊事秋七月
轉運使王罕帥惠州兵至智高解去廣州兵馬鈐轄
張忠與戰死之初智高圍廣州時洪州駐泊都監蔡
保恭及知英州蘇緘以兵八千人據邊渡村拔賊歸

路忠奪而將之謂其下曰我十年前一健兒以戰功
為團練使若曹勉之於是不介騎而前會先鋒遇賊
奔忠手拉賊帥二人馬陷淖不能奮遂中標鎗死王
罕為廣東轉運使儂智高入寇罕行部在潮廣州守
仲簡自圍中遣書邀罕罕報曰吾家亦受困非不欲
歸顧獨歸無益當求所以相濟者遂還惠州乃簡卒
三千方舟建旗伐鼓作樂順流而下將至廣悉衆登
岸斬木為鹿角積高數仞營于南門智高戴黃蓋臨
觀相去三十步見已嚴備不敢犯罕徐開門而入智

高遂解去楊政辟陶弼參軍謀使下英江會諸將議
擊未至智高解去弼舍舟從其徒數十人間關步出
赴政次臨賀大將蔣偕適戰死餘衆畏亡將被誅多
降賊弼數與之遇亟矯政命揭榜道上諭使歸許以
不死凡得千五百人智高圍廣州兵馬鈐轄蔣偕追
及戰于路田敗績九月賊方圍廣州偕馳傳十七日
至城下戰士未集會儂智高徙軍沙頭安撫楊政及偕
軍次賀州太平場賊夜入營襲偕殺之初偕入廣州即數知
州仲簡曰君留兵自守不襲賊又縱步兵馘平民以幸賞可

斬也簡曰安有團練使欲殺侍從官偕曰斬諸侯劔
在吾手何論侍從至是簡救不力言者論之遂落簡
職秋八月以魏瓘復知廣州初瓘知廣州築州城環
五里疏東江門鑿東西澳為水閘以時啓閉焉儂智
高寇廣東西獨廣州城堅守不能下於是論築城功
遷工部侍郎集賢殿學士復知廣州兼廣東經畧安
撫使給禁卒五千聽以便宜從事以孫沔為廣南東
西路安撫使時儂智高反沔入見帝以秦事勉之對
曰秦州不足煩聖慮當以嶺南為憂也明日聞蔣偕
死遂以沔為廣南東西路安撫使冬十月丙子太白
犯南斗詔益廣南行營兵命余靖提舉廣南兵甲經
制賊盜事庚午以狄青為宣徽南院使宣撫荆湖路
提舉廣南經制賊盜事十月詔鄜延環慶涇原路擇
蕃落廣銳軍各五千人赴廣南行營丁丑智高入賓
州甲申復入邕州十一月減廣南民秋租詔免廣南
民供軍須者今年秋租十之三五年春正月以廣南
用兵罷上元張燈置讌是日宣徽南院使狄青大敗
智高于邕州斬首五千餘級智高遁去先是青至即

合孫沔余靖兵復賓州戒諸將毋妄與賊鬪廣西鈐
轄陳曙輒以步卒八千犯賊潰于崑崙關殿直袁用
等皆遁青曰令之不齊兵所以敗晨會諸將堂上揖
曙起并召用等三十人按以敗亡狀驅出軍門斬之
沔靖相顧駭愕諸將股栗已而頓甲令軍中休十日
覘者還以為軍未即進值上元節大張燈以饗將校
酣飲夜分青忽起如內使孫元規暫主席青已整軍
馳奪崑崙關至歸仁舖為陣賊既失險悉出逆戰青
執白旂麾蕃落騎兵縱左右翼出賊前後急擊大收

之追奔五十里斬首數千級偽將黃師宓儂建中智
中及偽官屬死者五十七人生擒賊五百餘人智高
夜縱火燒營遁去遲明青按兵入城招復老壯七千
六百人凡為賊所俘脅者歷遣之築京觀于城南時
賊屍有衣金龍衣者衆謂智高已死欲以上聞青曰
安知非詐耶寧失智高不敢欺朝廷以貪功也初交
趾願出兵助討余靖言其可信青上奏曰假兵于外
以靖內寇非我利也以一智高而橫蹂二廣力不能
討乃假兵蠻夷蠻夷貪得忘義因而啓亂何以禦之

請罷交趾助兵從之及賊平人服其有勇畧初徭言
農家種糴家收至是智高果為青所敗二月赦廣西
免田租一年死事家科徭二年貢舉人免解至禮部
不預奏名者亦以名聞二廣舉人推恩者六百九十
一人丁壯饋運廣南軍需者減夏稅之半仍免差徭
一年

外史氏槩曰易言重門擊柝以禦暴詩詠綢繆
牖戶蓋謂禦侮之防當預也智高哨邕沿江告
急仲簡乃罪言者用是廣城無備賊得磨牙以
逞蔣偕數其罪責之凜如斧鉞及路田之戰簡
按兵不抹致偕執綏以死其罪豈下陳曙哉非
狄宣徽收崑崙之捷余靖懋勳之功則廣民
塗炭不知竟作何狀予讀宋書至此於簡不能
無遺憾也考之智高之反也是日太白犯南斗
則皇祐元年九月乙巳也及其敗也復書太白
犯南斗則四年十月丙子也不越月而智高死
廣南平天象洵有徵哉

粵大記卷之三

事紀類

廖永忠平粵

太祖高皇帝洪武元年春二月癸卯遣征南將軍廖永忠等取廣東勅諭之曰王者之師順天應人所以除暴亂解倒懸以慰民望朕昔平定武昌荆湘諸郡皆望風款附常遇春克贛州南安嶺南數郡邑相繼東歸此無他師出以律人心悅服故也今兩廣之地

嶺南郭棐篤周甫編

遠在南方彼此割據民困久矣定亂安民正在今日
彼聞八閩不守湖湘已平中心震懾無固守之志若
先遣人入宣布威德以招徠之必有歸款迎降者可
不勞師旅慎勿殺掠沮向化之心如其拒命舉兵臨
之扼其險要絕其聲援未有不下者且廣東要地惟
在廣州廣州既下則循海州郡可傳檄而定海南海
北以次招徠留兵鎮守仍與平章楊璟等合兵取廣
西用兵方略率用是道肅清南服在此一舉永忠等
拜命而行丙辰永忠自福州遣人以書至廣東諭左

丞何真真得書有歸附意壬戌 勅贛州衛指揮使
陸仲亨副使胡通帥本衛及南雄韶州等衛軍馬會
征南將軍廖永忠等征廣東諭仲亨等曰近命平章
楊璟等由湖南取廣西平章廖永忠等由福建取廣
東今特命爾等率師由韶州直擣德慶三方進師為
犄角之勢舉無不克廣東既下合兵以取廣西先聲
既震勢如破竹但當撫輯生民毋縱侵掠三月壬午
征南將軍廖永忠率舟師自福州航海趨廣東越壬
辰元江西行省左丞何真遣其都事劉克佐以廣韶

惠諸郡降夏四月辛丑永忠至東莞何真率官屬出見贛州衛指揮使陸仲亨略英德清遠連州及肇慶路進攻德慶元守將張鵬程棄城遁仲亨等遂引兵會廣州永忠師至廣州之龍潭元將盧左丞遣鎮撫盧成納款得海舟五百餘艘軍士二千九百餘人馬三百疋糧五千餘石命指揮胡通守之乙巳永忠師次虎頭門小張元帥以所部來降乙卯永忠及元將邵宗愚戰于廣州大破斬之廣州平初元偽叅政邵宗愚聞王師入廣州遣其黨羅元祥詣軍門降本以

覘軍勢而實無降意永忠謂之曰欲降則來無虛言以相款也宗愚遷延累日竟不至永忠知其詐乃下令往攻之夜二鼓發兵直抵其寨詰旦破之宗愚據三山寨兄弟俱殘暴嗜殺近境頗被其虐嘗再陷廣州大肆侵掠廣州民尤嫉之及面縛入城民往觀之爭唾其面遂與其徒皆棄市新會縣土豪黃彬河源縣曹文昌連州廖仁等復聚衆作亂自稱元帥永忠復捕誅之南海縣人麥祖康以魘魅蠱毒殺人又捕斬之廣州既平永忠遂進兵取廣西命永嘉侯朱亮

祖鎮廣東總兵官之出鎮蓋倣於此秋七月何真率其官屬入朝授真江西行省叅政冬十一月李質以德慶封川歸附以質為奉訓大夫中書省斷事質賑濟山東時上賜以詩曰遣卿持檄按齊東念爾賢勞苦厥功經國老臣勤苦恤行天使者起疲癯官儲有粟宜從賑囊橐無私任至公七十二城皆歷遍馬蹄無處不春風十二月耿天璧取海南南海北州縣嚴州衛指揮同知統本衛軍征海南克南安儋萬等州真生黎化黎小錫洞主汪官泰等大敗之又以恩信招諭各賊使降於是南海悉平

外史氏棐曰孟子輿言三代之得天下也以仁誠然哉然未有若我

太祖高皇帝之下廣東真堂堂哉仁者之功也廖永忠師次于南韶而何真降書已達于滌戟矣是以兵不戰而倒戈城不攻而受壘民心不貳而殷殷輸服即九真日南朱厓儋耳不賓之國亦皆獻琛內附則我

高皇帝柔遠之仁不殺之武豈不度越百王哉雖然

何真李質之功不可少也保其境土內安人民
而外攘寇亂以待王師之至稽首歸命馬上以
輸忠

真主下以懷保遠民即馬援之識真竇融之保西土
曷以加哉是故於廖永忠帥師之後連書何真
李質之降美具見矣

黃蕭養亂廣

黃蕭養者南海冲鶴堡人貌甚陋頗饒智術一目眇
先是坐強賊繫郡獄逾年所卧竹床皮忽青色漸生

竹葉同禁者一江西商人謂曰此祥瑞也因誘以不
軌密授人使藏利斧飯桶中遂破其肘鐐凡十九人
俱越獄惟商人遂逸去不知所在時官隸獄卒追之
揮斧而行人莫敢近其黨先舟以待遂入海去正統
十三年九月也尋嘯聚不逞之徒應之者如響旬月
至萬餘人明年八月攻圍郡城官軍出禦輒敗城中
饑死者甚衆又為雲梯呂公車衝城城幾破遂設開
偽官招誘愚氓漸至十萬餘人都指揮王清
清字一寧慷慨
多勇畧嘗出塞累立奇功至
是失利被執罵賊不屈而死自高州引兵赴援至廣

州舟膠淺水適賊詐一小艇載柴及魚鹽者奔迸若
避賊狀官軍問蕭養所在言未脫口賊伏兵出柴中
遂執清軍盡殲焉城中大恐三司官登城望之刃如
蝟發相顧涕泣而已事聞時適土木之變未暇景泰
元年春詔都督董興充總兵都指揮同知姚麟副之
兵部侍郎孟鑑僉都御史楊信民贊理軍務往討時
蕭養乘勝之餘志氣益橫遂僭稱東陽王改授偽官
者百餘人據五羊驛為行宮四出剽掠信民先為廣
東叅議有惠政素孚於民及是巡撫廣東至廣州民
爭歸之 上勅信民曰比因寇賊攻圍城池劫掠鄉
村人財已竭勅爾會同侍郎孟鑑及廣東都司調撥
所屬衛所官軍及附近有司起取民兵并催取廣西
調來官軍同心協力勦滅前徒近又命都指揮同知
姚麟前來與爾一同提督今聞廣東都司缺官爾可
會同本官於本處所推選的當廉幹公勤驍勇指揮
二員就令署管司事差人星馳具奏定奪爾等尤須
晝夜用心運謀設策獎勵士卒敢勇當先殄滅賊徒
以靖地方官軍如有臨陣退縮及失誤軍機者即依

軍法斬首示衆然後奏聞如勅奉行信民發粟賑濟
民益喜賊黨聞之漸懈興等進兵時天文生馬軾隨
行至江西入夜聞鷄鳴興曰此何祥也軾對曰鷄不
以時鳴由賞罰不明願公嚴軍令及至清遠峽有白
魚入舟中軾曰武王伐紂有此徵應此逆賊授首之
兆也時蕭養聚船於河之南千餘艘勢甚銳諸將欲
請兵軾曰兵貴神速若請兵則緩不及事以所徵兩
廣江西狼兵取勝猶拉朽耳興從之三月五日夜有
大星墜於河南比旦占之告興曰四旬內破賊必矣

四月十一日興統兵次於大州頭與賊遇督戰遂大
破之時信民使人齎榜諭賊使降蕭養曰揚火人我
父母也當徐思之已而獲鉅魚來獻信民受之立斫
數十片頒於有司賊出而嘆曰勢不佳矣賊黨遂潰
留者不滿千人已而信民中毒卒鑑益招徠興領兵
擊賊又破之蕭養中流矢而卧遂為官軍所擒械京
伏誅廣州遂平詔以鑑代信民巡撫廣東分南海地
置順德縣仍割大良等堡以益之

外史氏柴曰蕭養以蠛蠓小醜犯斧鑕大憝越

獄而逃越城而走當事者不即緝而獲之乃容
其下海鳩徒反而攻城岌岌危若累卵當時法
網亦殊疎濶哉卒之就擒固乃天亡之也豈人
力耶楊撫院鞠躬盡瘁死于其職或云中書豈
其然乎然孤忠駿惠即粵人萬世尸祝之可也
王清死于戰陣獨不可配忠襄乎予聞之蕭養
帥衆急攻佛山欲劫其缺器助兵具也乃見有
紅面將軍督卒戰守而賊徒被傷者甚衆膽寒
股栗撤衆而退嗟嗟叛逆么麼壯侯在天之靈

厭之矣能無敗乎表而書之以戒後之敢於為
逆者

山箐聚嘯

洪武十四年秋南雄侯趙庸討程鄉賊平之

庸帥潮州衛官軍擒賊首偽萬戶饒隆等一百五十
人斬首四十餘顆

十五年春正月南雄侯趙庸討東莞諸寇二月討陽
山歸善等縣蠻寇平之振旅而還

庸進兵攻破東莞縣石鼓赤嶺等寨擒偽官百餘人

由是四會白沙等處父老迎拜於道二月辛巳移兵
討陽山諸賊克燈心龍湖太平潭洞擒賊偽萬戶長
都公等數十人斬首千餘級降二千九百戶庸又籍
廣州蛋戶萬人為水軍時海蛋無定居或為寇盜故
籍而用之又俘獲賊首鏟平王者并其黨一萬七千
八百五十人斬首八千八百餘顆降平民一萬三千
二百八十七戶諸寇悉平奉 詔振旅而還 帝加
獎慰 賜綵帛上尊良馬

十六年秋八月廣東徭亂遣征南將軍申國公鄧鎮

討平之

時廣東徭賊作亂標掠旁近由是江西永新龍泉山
民互相扇動結聚徒黨自稱順天王勢甚猖獗江西
都指揮同知戴宗率兵剿捕不克至是 命鎮等將
兵往討之

三十一年春三月仁化縣賊鍾均道寇南韶肇慶西
山徭作亂命指揮王濬等討平之三十二年三月賊
首鍾均道降

鍾均道作亂寇掠南韶官軍討之輒遁湖廣界上至

是聽撫歸降詔以為扶溪巡檢司副巡檢

景泰四年夏六月瀧水徭賊作亂巡按御史盛景諭
降之

瀧水賊猖獗巡按御史盛景單騎諭之遂降

七年瀧水徭賊作亂提督都御史馬昂討平之

瀧水徭趙時旺作亂合諸山叛徭大肆殺掠民罹其
害昂乃調廣西狼兵同官軍直抵徭巢斬獲甚衆

天順六年春廣西流賊入寇新會縣縣丞陶魯討平之
廣西流賊入寇民多被虜掠魯時為邑縣丞募邑之

才子弟有恒產者各率家丁為敢勇兵討平之能名
大著擢知縣事

冬十二月廣西龍山賊寇靈山縣太學生檀超死之
成化三年冬十月流賊寇石康知縣羅紳死之

先是廉州流賊寇石康知縣羅紳使其子破之至
是賊益衆來攻城中兵少遂為所破紳被執罵賊而
死後廢石康入合浦

二十三年番禺縣盜譚觀福作亂僉事陶魯討平之
觀福者橫潭洞獠也恃險為亂至是陶魯帥諸軍平

之後有姚觀祖等作亂尋亦伏誅

弘治十六年惠州大帽山賊起提督都御史潘蕃討平之

一名大望山在興寧縣北九十里徃寇據之勢張甚其渠魁彭錦據大信輦劉文王據寶龍練成才葉清各據險四出流劫都御史潘蕃檄三司統調漢達土兵剿之始息

正德元年七月連州賊梁苟龍作亂九月東莞塘貝盜起皆討平之

十二年冬十月九峯賊攻樂昌城知縣李增擊破之九峯賊勢猖獗知縣李增備禦有方乃引去又攻乳源縣城上以藥弩射之賊稍退又以車攻放火燒之賊懼而遁

十四年冬十一月恩平賊蘇萬里等亂提督都御史楊旦討平之

先是萬里與陽江縣賊馬文廣等合夥數百流劫恩平陽江陽春新寧諸縣地方屯聚蓮塘樂安之間道梗不通守巡該道右叅政章拯僉事陳綱議調肇慶

陽春新興恩平府縣民壯打手鄉撞兵委知府黃瑗
都指揮卜玉通判毛鵠余龍推官金鶚指揮黑明費
銘知縣黃寬等督領分道勦之擒斬九百七十名顆
俘獲賊屬二百八十四名口地方始平

十六年封川開建徭亂提督都御史蕭紳討平之
嘉靖三年歸善縣賊李文積等亂總督都御史張嶺
討平之

文積歸善桃子園居民招集奸宄教習武藝蓄買鞍
馬私通關防票帖擅用頭踏嚮器開旗流劫鄉村奪

占田地官兵捕之久弗克至是嶺等調集漢達官軍
打手鄉夫七千餘員名委守巡嶺東道左叅議徐度
僉事施兩督同守備指揮程鑒同知莫相指揮劉璟
等領勦俘斬一千一百三十二名顆地方遂平

四年流賊江文生等亂提督都御史姚鎮討平之
惠潮二府與福建汀漳江西南贛延袤數千餘里自
昔流逋為患文生等本烏合之黨白晝流劫饒平潮
陽長樂諸縣並受其害鎮等會行嶺東兵備僉事施
儒分守叅議汪思督諸官兵討之擒文生餘黨遁去

是年歸善賊賴貴等亂提督都御史姚鏌討平之
貴本賊首李文積之黨文積誅貴率其黨降既而復
亂流劫鄉村鎮等督指揮高英楊昂推官周楫李喬
木守備指揮程鑒將兵擒貴斬之事始寧

六年和平會寧民賊亂提督都御史姚鏌討平之
和平舊係惠州府泃頭地正德間池仲鬻等倡亂提
督南贛都御史王守仁討平之奏立和平縣於泃頭
至是賊首魯蛇仔盧源鬼吹角黃尚琦等背招倡亂
流劫河源翁源諸鄉村鎮等會督嶺東嶺南道守巡

并守備惠潮南韶都指揮等官督兵會合南贛官軍
夾攻俘斬六百三十九名顆巢穴悉平

是年會寧民賊亂都御史姚鏌討平之

先是新寧新會蓼塘旱塘長塘等處民雷骨子林子
祥湯宇等聚眾流劫地方蒙禍嘉靖癸未曾經大征
漏誅復出流劫斗峒大巷潮透等鄉村至是鏌等行
委嶺南道守巡副使徐度左叅議周震督備都指揮
王蘭督領打手一千三百餘名分道夾攻俘斬三百
七十名顆餘黨始平

七年秋封川石硯等山賊亂提督都御史林富討平之
九年新寧新會巢賊亂提督兵部右侍郎兼右僉都
御史林富討平之

先是會寧各巢劇賊據險有年流毒無極正德之末
猖獗猶甚嘉靖二年徵兵大舉斬獲首級雖以萬計
而那潮墩寨康搥藤峒九逕雷坑大隆山賊首曾友
富丘區長廖悌奴林仲貴長塘平田相崗賊首宗英
方長皆未遭兵復聚衆流劫鄉村為亂歲久至是富
等調集漢達土官軍兵三萬一千九百餘員名分為

二大哨分道進勦俘斬一千八百九十餘名顯餘黨

招安復業

十二年陽春新興德慶賊亂提督兵部左侍郎兼左
僉都御史陶諧討平之

先是陽春縣西山雲廉叅峒湖峒坐羅下雙茶場賊
首趙林花唐觀政唐朝用盤勝富郭安富何總管裨
文安黎廣雄德慶州東山南鄉葵嶺賊首鳳二全師
安盤僧堂新興縣黃三坑石壁等巢賊首盤晚太鄧
大弟盤世寬皆恃山險聚衆剽掠鄉村殺虜男婦嘗

攻高州城庫敵殺官兵居民被其騷擾已數十年至是諧等調兵六萬三千分為三大哨分道並進攻破巢寨一百二十五處擒斬三千七百九十九名顆俘獲賊屬三千七百二十名口他物稱是

十三年瓊山黎黎佛二亂提督兵部左侍郎兼左僉都御史陶諧討平之

黎黎佛二瓊山縣人作亂殺典史李士奇擄千戶杜盛百戶楊榮入寨都御史陶諧與咸寧侯仇鸞討之執佛二戮于市餘黨悉平

十四年連州賊文興隆等作亂提督都御史陶諧討平之

先是江西客人在於連州揚旗白頭楊柳大帽東坪巖塘等寨放債逼利興隆與馮隆林宗福林晚仔陳昂等聚衆殺之懼官追捕因合流徒僭稱名號團結一十六營嘯聚三千餘衆擁入青梅二水占據村峒為亂凡五六年屢撫屢捕不能平至是諧調漢達官軍土兵二萬八百餘員名討之俘獲二千餘名顆餘黨悉平

二十年海南黎賊亂寇凌水提督兵部右侍郎右都御史蔡經討平之

瓊州府懸隔海南即古珠厓之地內有五指諸山高而嶮巖為黎獠所據州縣環列於其下黎性曠悍善為強弓毒矢射人自昔難於控制陵水縣在府之東南村凡九十有六為賊首那任紅眼那紅那卓羅常那網羅惠那碍那來等劫殺殆盡僅餘附郭一村而崖萬二州時遭慘掠東西數百餘里道塗阻塞曾經請討適有事安南未遑也至是調漢達官軍士兵九

萬七十員名分為中左右三大哨討之俘獲五千五百餘名顆

二十四年封川徭民亂提督右都御史張岳討平之封川縣歸仁文德二鄉大滑腦洪秋南吉大貨黑石麒麟白馬蓮花等巢山徑多岐崖延袤深林疊嶂窮險莫測自古為徭獠所居至是賊首蘇公樂張公蓋李公請陳公黨左公珠聚眾為亂時出鄉村攻劫岳等調集漢達官軍士兵四萬八千六百餘名分為左右二大哨勦之俘斬二千五百餘名顆

三十五年會寧新恩賊亂提督兵部侍郎談愷討平之
新寧在新會恩平之交久為盜區弘治間勦平之割
二縣之地立為縣林箐深密依山負海不數年盜復
叢起石鼓茅舍那西黃沙坑楊公逕等寨賊首許以
明林宗興朱丕陳孔榮等為逋逃淵藪聚眾數千僭
稱王侯等號分支流劫於是新會之崑崙諸山恩平
之閔村青藍角等寨新興之陳坑雙石良塘香山諸
巢皆群起響應巡按御史郭文周請討之僉事王德
林應奎等督兵征進而各賊東奔西逸迄無成功提

督兩廣兵部侍郎談愷既至軍門與三司議咸曰賊
衆繁多地聯四縣非八萬兵不可適東蘭南丹那地
等州目兵以征倭調集奉命停止愷曰吾事濟矣
迺以諸州目兵及漢達官軍打手共三萬人分為嶺
南嶺西二哨賊率衆拒敵各兵奮勇殊死戰所向披
靡時新會賊聚於閔村古餘新寧賊聚於黃坭型再
聚於百峰大山恩平新興賊聚於黎源沙峒再聚於
陳坑良塘雙石頂據險以待我兵乘夜霧昏黑出其
不意悉攻克之勦平巢寨擒斬首從賊級四千二百

九十八名顆俘獲賊婦男女一千二百四十五名口
奪獲牛馬一百五十七頭器械賊物五百九十九件
奪回被虜男婦一百四十四名口
三十六年大小羅山徭亂提督兵部右侍郎兼右僉
都御史談愷討平之
廣東大小羅山徭接壤清遠四會懷集諸處出沒不
常至是肆出無忌生靈荼毒侍郎談愷議調土漢官
兵七萬有奇分為嶺西嶺南左右各二大哨嶺南哨
兵既進會愷奉

旨致仕南贛都御史王鈞晉兵侍於軍中交代先後
俘斬八千六百餘名顆是舉也嶺南哨坐鄒繼芳不
振賊多漏刃惟嶺西哨實收全功鈞議將剿平賊巢
割四會數里 奏立廣寧縣而大羅山之患遂賴寧
謚

四十三年興寧賊葉丹樓花腰蜂等亂提督侍郎兼
右僉都御史吳桂芳討平之

自嘉靖壬子以來倭奴為中國無賴勾引內犯浙直
諸郡以次及閩及廣潮海之間歲被其患然尚倏至

倏去至嘉靖癸亥則屯住潮揭海濱不復開洋衆號
一萬甲子春新倭萬餘繼至與舊合夥屠戮焚掠之
慘遠近震駭桂芳新奉簡來鎮滄梧甫二旬即躬
董師東向前後動調狼土勁兵四萬五千福兵一萬
五千以伸威營總兵官俞大猷帥之副總兵湯克寬
叅將王詔門崇文副之僉事徐甫宰監之相持兩月
賊被圍困不得野掠乃復分夥思遁我兵乘勢擊之
一戰於減水神山溝俘斬一千一百二十七名顆再
戰於海豐大德港俘斬一千三百一十三名顆賊奔

潰下海又陸續擒斬六百六十二名顆餘賊掠船開
洋者遇颶風三日覆溺俱盡

四十四年德慶上下江山徑出劫提督侍郎吳桂芳
建議開山伐木立營鎮平之

廣東德慶羅旁上下江道為兩省咽喉數苦徭人出
江劫掠而下江為甚官民舫船經過多被囚虜賊殺
行旅阻塞咸請大征桂芳建議以為徭性頑冥無大
伎倆誅之不足示武留之足為浪賊藩籬彼所恃者
獨沿江茂林深菁潛伏伺劫而行者不能避故及於

難發惟督兵於沿江徭岸開山伐木徹其障翳剪其
羽毛載芟載柞且耕且守以坐制其出沒之命使彼
不得播惡於江上則固可聽其偷生於穴中矣省費
罷兵有近功而亦未嘗不有遠效治以不治之策似
不出此疏上 朝論韙之以原任副總兵解明道分
巡僉事李偕專司董督知府鄒光祚德慶守備楊弘
舉通判楊士中分董之工始於本年正月迄於是年
十二月上自南江口下至新村泮水凡一百二十里
間各關地入深十里立營十所營各兵百名或二百
名戍之旌旗相望砲鼓相傳木拔道通狐潛兔伏於
是江道肅清孤帆夜渡矣

四十五年河源翁源龍門英德等賊李亞元鄧廷鳳
官祖政等作亂提督侍郎吳桂芳討平之
各賊自嘉靖三十六年以盜礦倡亂轉相煽誘連絡
廣韶惠三府河翁龍英及從化和平六縣為巢二百
餘所有衆四萬餘人附近郡邑千里之間屠慘焚掠
慘不可言桂芳 請調土漢閩浙官兵八萬分五道
進兵討之以伸威營總兵俞大猷為五大哨總統叅

政郭應聘副使張子弘劉穩王化僉事李偕司監督
參將王詔亦孔昭周整遊擊將軍魏宗瀚戴冲霄分
司統督仍約南贛師為龍南一哨自嶺北進夾擊之
兵威大振所向克捷俘斬一萬零四百六十七名顆
撫處過四千一百三十人賊服毒自刎及投崖縱火
自焚死相枕藉者無算李亞元鄧廷鳳等皆生磔于
市人爭啖其肉諸巢盡平

隆慶四年冬潮惠劇盜蘇繼相曾魁等作亂提督侍
郎李遷討平之

繼相本惠之長樂人其叔璉兄繼春以盜礦聚眾為
盜繼春因官兵捕急自縊死繼相糾其黨三千餘徒據
揭陽之黃寨為巢號天一大王脅撫賊吳成龍剗湯
田劉興策剗赤秋溪黃瑞剗大順鄉互出為盜又令
璉父子潛住長樂郭田寨伺探兵機成龍寢不用命
繼相嗾其黨殺之併其眾五六千徒攻城略村阻絕
通衢屢狀上聞事下前總督侍郎劉燾巡撫僉都
御史熊梈會謀按察使張子弘僉事楊芷總兵郭成
討之子弘剗長樂先擒璉暨其子繼良等絕其聲援

楊芷郭成各督步兵進剿繼相率黨逸劫龍興子弘
趣遊擊李誠立偕郭成兵戰于散坑寨繼相窮蹙欲降
成藉口歲暮解兵令把總戈南押繼相回黃寨安插
時復倭寇陷廣海巡按御史楊標遂劾成削職充為
事官繼相歸巢乃據險拒敵賂戈楠透報兵情要曾
魁杜高山互相連結據大節山為巢與蘇曾協倚稱
為三窟民甚苦之隆慶四年夏提督侍郎李遷奉
命至下令曰廣東募浙福精兵歲費不訾原為征剿
山賊今總兵休兵日久乃晏然高枕轅門然則蘇曾

諸賊將置之不問乎遂檄諸道暨郭成刻期進兵又
而詰成受賄解兵將蒙赤族之禍成懼泣以死自誓
謂不得繼相不敢再見督府于是調兵二萬分為三
哨繼相率騎賊六百徒逆戰于東梨樹下敗之李誠
立斬闕破巢賊已潛奔別峒成懼師久無功斬戈楠
以徇諭撫民劉興策詢知繼相所在統諸軍進攻生
擒繼相并賊總李南山范國興等還師乘勝掩曾魁
不備生擒之又擒其賊總謝三等杜高山見蘇曾已
擒益厚集徒黨拒敵官兵襲奪官糧督府下令責諸

將以小勝而驕惰遂有此失三哨官兵感激奮勇遂
合破大筇山巢斬俘無筭賊徒藍友道等棄戈投降
杜賊窮蹙僅以二十餘徒逃遁銅鼓嶂石巖遣賊徒
張大往撫民黃瑞巢買米瑞報官兵引至石巖擁入
生擒之餘賊奔散蘇繼相曾魁杜高山俱械解軍門
高山劇奸獲妾鄒氏同舟以妾娛解者踈其械梏至
銅洲江夜遁事聞督府震怒寘解者於法嚴令搜捕
嶺東道叅議許天琦督兵密緝於藍溪徑獲之時捕
賊令嚴兵民戒備曾魁哨下總管黃蠻牛聞高山脫
走潜伏歸附鄉兵獲之高山哨下甲頭李朝信被兵
破巢潛回舊土鄉兵獲之以杜賊之遁為嚴緝捕而
黃蠻牛李朝信因就獲焉兵威震赫兇黨無遺矣海
豐賊首曾朝元聯結各寨賊首鍾應亮等擁黨萬餘
流劫長樂歸善揭陽普寧諸縣攻破圍寨數百殺戕
民命不下數千稔惡二十餘年前總督都御史劉燾
巡撫都御史熊桴題奉 欽依責成撲剿止擒獲鍾
應亮本賊逸出四年二月復糾黨三千攻圍殺掠興
樂一圖盡死其手又攻破虎墩寨脅民從盜督府申

令各哨官兵乘勝出奇剿殺于是按察使張子弘密與李誠立議懸重賞鼓死士攻其無備三月初五夜三鼓官兵銜枚進巢黎明炮箭齊發各兵奮勇破賊十一巢擒斬首級五百餘顆焚死者千餘朝元死刃下并俘獲其妻子無一生遺者隆慶元年楊仁寶按蘇繼相巢衆見其驍勇推為都總統衆流劫興寧程鄉長樂等縣蘇賊就擒糾合殘孽肆出剽掠督府節申飭各官今兵力方銳務將各賊攻剿盡絕方許班師于是總兵官郭成督兵益急遇賊擒斬衆多投降

仁寶帶黨二十餘徒遁鷺毛山副使江一麟并原任副使王化遣間偵探既實即分兵進鷺毛山招出深入者七人餘徒就戮生縛仁寶械軍門與繼相等同磔于市地方底寧士民稱快

五年英德賊廖廷璧錢孔恩成周山等作亂提督侍郎李遷討平之

廷璧據天堂寨孔恩周山據大竹園寨巢穴聯絡聲勢相倚自嘉靖四十一年倡亂寇劫清英三水等縣與湖廣藍武廣西懷集等處高道等鄉殺虜人畜占

據良田廷璧僭號為五府大都督稱雄逾十年流毒
徧三省邑人陳益明黃瑜等兩次叩闕聲寃事下
總督右都御史劉燾勦處時兵力牽於海上未暇及
此賊益猖熾迨侍郎李遷蒞鎮警報日聞于是檄南
韶兵備僉事諸察調集所在官撫徭兵初戰于大陂
坑僅有擒斬再戰于天堂大巢遂擒廷璧又戰于茶
坪砦併孔恩周山皆生縛焉餘黨悉平

六年春河源賊首唐亞六諸廷羨從化賊首萬尚欽
英德賊首張廷光等作亂提督兵部侍郎殷正茂討

平之

先是各賊皆以盜礦而起轉相煽誘寇劫廣韶惠三
府地方嘉靖四十五年大征亞六等漏刃逋誅陸續
糾集黨與復盈千餘據雙嶺等處為巢流劫增城龍
門從化和平河源翁源三水等縣地方逼近會省遠
近震驚前右都御史李遷下令諸司調土浙官兵一
萬二千分四道討之以總兵官張元勳為總統約會
贛師於北路布截尅以歲前十月十一日舉事兵既
進會遷以遷秩行正茂以奉命至計進兵越八日

益鎮俘斬六百七十二名顛投降六十六名顛師所
獲者弗與焉亞六等諸酋首悉生擒解軍門棄于市
黨類悉平

是年秋恩陽會寧交界懷寧苔村三巢賊首羅紹清
侯惟貞林翠蘭等恩平十三村賊首陳金鶯新寧藤
峒等十巢賊首黃飛鷹等久亂提督侍郎殷正茂討
平之

萬曆元年春惠潮山賊久亂提督兵部右侍郎殷正
茂討平之

惠潮壤接江閩界山川險峻林木茂深大賊首藍一
清據馬公寨巢賴元爵據螺溪寨巢馬祖昌據三溪
高潭巢黃民泰據藍溪巢曾廷鳳據九丫樹巢黃鳴
時據八萬峒李仲山據東坑上屋坪巢卓子望據黃
埔分巢葉景清據碗窰曾仕龍據銅坑巢糾黨萬餘
衆分次賊首刁世興鄒嘉儒等各據洋烏潭南峒掩
桑等處彼此響應遠近附從自嶺東一帶外而贛郡
內而翁英東莞等處莫不胥受荼毒殺人動以千百
計慘不可言地方士民奏牘陳詞殆若山積至是

正茂以奉命至鄉士夫告曰賊之毒害擢髮難數
謹繪圖畫狀刊刻其節年劫害人民次略屠圍殺人
形狀幸有以處之正茂覽之因為之墮淚曰曩聞其
事未若見其形今憫其情不忍觀其象遂慨然謀之
司道官衆曰根深蒂固巢險路危且山川遼濶實繁
有徒若圖一鼓蕩平非十萬之師四五十萬之餉不
可今但克其一二巢庶幾少示懲創足矣正茂曰去
草不除根終當復生要在取次而圖正古人乘勝之
謂也然時下倭警未寧當有以緩其勢以携其黨遂

下令曰弭盜之策原有勦撫二端從其順逆而已今
章程營兵大集伸縮在我但不教而殺非仁者之師
宜宣諭各巢順者與其生全逆者誓當殄絕于是楊
崖曾萬璋江漢者告願編籍當差送子入學一惟其
請以示不疑日但集司道講議兵糧籌畫進止謂耳
以藍賴為名而其一應凡先今作惡陽招陰肆者不
盡誅之不止遂檄調廣西狼土官兵二萬併章程營
兵添募閩廣兵共二萬分四道進以叅將李誠立沈
思學遊擊將軍王瑞原任叅將王詔將之總兵官張

元勳司總統馬以叅政唐九德陳奎副使蘇愚叅議
顧養謙監之以副使吳一介總監諸軍兼糧賞紀坊
馬與總兵官同營調度謀筭既定疏聞剋以歲前
十二月初二日舉事首破冷陽峒直抵馬公寨螺溪
巢俱所向即克軍聲大振群兇膽落報功接踵因再
申前議二府一應叛服不常之徒移兵順勅有一不
滅決不班師官兵益感奮所至資糧於敵士免餽運
由是洋烏潭大坪三溪高潭赤花藍溪鮪溪東坑上
屋坪高沙石坑九丫樹八萬峒葫蘆峯埔尾麻竹等

處大巢相繼而下各小巢望風瓦解正茂復曰至此
萬全祗恐官兵驕惰或有漏誅移詣惠州駐劄督師
爬搜如故是役也凡三閱月賞餉五萬六千有奇俘
斬一萬二千二百八十六名顆內經奏有名大賊首
六十一人次賊首賊總六百餘人賊屬牛馬無筭捷至
聖天子喜御殿前宣捷受百官賀先是摘留藍一
清等十巨酋待命解京事下本兵議曰途遠勞人
行回盡磔于市兩廣二十縣盡就肅清一方稱慶
四年冬十一月總督兵部侍郎兼右僉都御史凌雲

翼討平羅旁諸賊州縣其地

羅旁東界新興南連陽春西抵鬱林岑溪北盡長江
與肇慶德慶封川梧州僅界一水延袤千里萬山聯
絡皆徭人盤據其間世稱盤瓠氏遺裔租賦不入生
齒日滋蠶食旁近諸村州縣賦稅因而益縮性頑犷
嗜殺多伏毒弩以急榜橫江中奪舟越貨卽制帥大
吏過之不為憚又多萃四方亡命名曰浪賊為之肘
翼虔劉人民攻圍城堡嘗曰官有萬兵我有萬山兵
來我去兵去我還 國朝自申國公鄧鎮討平後

叛萬曆三年督府殷正茂方且圖之會徵為戶部尚
書候代間尤期撲滅遂歷陳羅旁當討狀上之疏入
報可議者猶以敵堅難焉督府凌雲翼至毅然以為
已任籌畫機宜謂是役非師二十萬不可詔從之於
是鳩糧餉繕戎器選將領嚴監督集間議戰守布置
悉定以總兵張元勳李錫分駐瀧水東西統督以副
使趙可懷監諸軍既誓師各授方畧仍諭順者撫之
無玉石俱焚以傷天和乃剋十二月二十日進兵賊
猶據險阻聚礮石礪犀銛聚衆據守以抗我師凌雲

翼復三令五申將卒感奮連破石龜百片逍遙石子
上下臺等處堅巢軍聲大振賊遭挫敗竄伏林箐樹
立圍寨要以招撫息兵欲緩我也各兵併力攻堅諸
巢悉下勢如破竹惟龍水山大菁深賊多逃匿復檄
二總兵統率十哨會搜誅夷殆盡師閱四月攻破賊
巢五百六十有四擒斬一萬六千一百四名顆賊魁
盡戮凍餒焚死築京觀馬投降四百九十三名俘獲
賊二萬三千一百五十一名口奪獲器仗牛馬無算
捷書入 天子稽自昔征蠻無若羅旁者於是宣捷
告 廟受百官賀賜凌雲翼白金飛魚服晉右都御
史蔭一子備宿衛
六年大廟巢賊久亂總督兵部侍郎兼右僉都御史
凌雲翼討平之

英德賊巢惟大廟最鉅與陳黎二峒大小羅山諸巢
相犄角出没叵測屢征輒逃陽撫陰叛流劫清遠英
德從化番禺諸邑殺虜弗可勝已而大樟周峒高峰
圍烏柏埔諸黨復相響應勢益蔓延南韶兵備僉事
姜忻請于督府凌雲翼南贛軍門蒙詔勦之躬率官

皇大言 卷三 三十
兵分布要害以守備胡九經等屯劄紫馬營遏賊奔
援賊瞭兵至先遯屯據白芒山頂迎敵我兵還匪奮
攻賊勢披靡遂乘勝追逐墮崖投谷無算擒斬首從
何本盛梁宗富等四十名級餘黨逃竄各兵復披堅
冒險搜斬盤雲興等又六十名級前後俘獲賊屬一
百零五名口噐仗牛馬不計大廟既平姜忻仍帥九
經同典史柯繼芬各統部兵擒斬大樟諸巢賊首唐
景松等五十一名顆

八年龍川河源界緱嶺巢賊作亂總督兩廣兵部侍

郎劉堯誨討平之

先是賊首鮑時秀僭據義都猴嶺三十年矣分部各
賊占奪該都田土萬餘畝築城統衆專擅殺戮以次
蠶食鄰州縣部署賊將與嶺東賊首藍一清賴元爵
等爭相雄長既藍賴諸酋黨經前後軍門勦撫而時
秀負險擁衆有本都民殷文字等赴闕請討下部
議移咨前督撫殷正茂檄司道集議時以兵力不足
遂寢之因就撫處故鮑首逆節渝萌至是總督抵鎮
屢據被害難民聯詞控籲乃密授方略令各道叅計

擒之鮑賊遂率領部落叛出于河源上管張溪地方
人心危動即具疏以聞下令討之以分守左叅議
劉倬兵巡副使張堯年監督叅將季金遊擊葉歡守
備陳居仁各率領營兵分道夾擊總兵官黃應甲遙
領之所向克捷陣中生縛時秀以獻既創傷死函屍
與房伯祿等械解轅門梟磔于市討擒斬大小賊首
賊黨共三百四十九名顛俘獲賊屬男婦五百五十
九名口牛馬器仗無筭盡犁其巢穴而以其土田給
民嶺東各撫民向皆擁衆觀望聞捷皆毀巢撤圍乞
為編氓惠潮江閩之間俱平

是年羅旁徭浪賊叛詔總督兩廣兵部侍郎劉堯誨
討平之

羅旁大征之明年該總督都御史凌雲翼議再調狼
土等兵數萬搜勦之不果行故餘黨漸復萬曆七年
春夥合西粵六十三山等徭攻打封門所不克連破
燈心大傘二三營堡以後時時四出劫掠有大臺山
賊首陳亞弟等因伏路攘奪巡按火牌厚索贖金得
志故石牛青水等巢賊首白眉哥梁前山等往來於

鐵場紅豆間糾合大臺大凹大降白雲等山徭浪賊
相繼叛出於思約營道洲埔地方為害時羅定州差
吏賚儒學印記于撫院各賊邀殺州吏而奪其印且
要挾罷兵以便歸復先後該撫按衙門題請勦除
節奉

聖旨專責總督軍門措畫以終前功時正盛夏即下
令兵巡官徐時可侯應爵等密行間諜先携其黨與
使賊人力分而專督東山副總兵陳璘戴罪殺賊以
遊擊朱文達守備葉騰鳳左右援應之乃督發三

營兵及戍梧狼獾等兵萬餘名分道並進各賊不謂
夏仲行師計無所出且各巢食盡諸撫徭亦以新穀
不繼互相拒堵凡三閱月擒斬俘獲三百六十六名
顆賊首陳亞弟白眉哥等俱械送軍門磔于市舊奪
去印記於賊屍中搜得之迺按令各路兵不動樹柵
守險以為久困計而各賊饑死墮崖谷中者枕籍無
筭於是兩山撫徭皆願赴軍門求殺賊報效乃遣人
諭之我自有兵不煩尔等第善耕守毋妄動耳即所
破石牛青水等巢築城立營構公署若干所而以把

總招領附近狼種千餘人守之人給田二十畝各於
田所與築圍以居又廣西岑溪縣連城等鄉向為羅
旁各賊堂與議設叅將衙門一分司一築城樓櫓具
備與廣東西山叅將各以信地相為聲援

二十四年岑溪七山徭浪賊連結六十三山作亂總
督侍郎陳大科移東三省廣西巡撫都御史戴耀討平之

廣東羅旁與岑溪七山壤相連也群徭盤據山中出
沒煽禍萬曆初年大征羅旁當事諸臣議乘破竹之
勢移兵誅之旋復報罷迄今人以為失策嗣是黨類

日滋時時蠢動至二十四年加之以饑饉勾之以浪
賊遂大肆劫掠首屠乾廂一村男婦止遺八人連結
六十三山諸徭攻破聖堂北科等營兩山震恐而夜
護封門諸處人家盡遷徙矣督臣陳大科亟集羅定
諸道叅政洪有復等議調兵征之適廣西撫臣戴耀
移書借兵東粵大科曰百粵吾粵也西民吾民也是
維吾之任何稱借兵為則檄副總兵孟宗文叅將卞
時雍守備黃鍾統兩山中踞營兵為東哨從東踞入
檄故將陳璘吳廣把總麻上錦統軍門暨總兵標兵

為西哨馳至岑溪與西土漢兵合從西路入發令
旗牌齊鼓而夾擊饅頭山一戰吳廣功最奇賊膽乃
破于是棄七山遁入六十三山伐木堵截道路伏藥
弩林中以阻我兵督撫臣益申號令懸重賞兵益感
奮凡閱三月蕩平之斬級以千餘計俘獻以數百計
所獲牛馬鹵伏無筭捷聞 主上嘉悅晉大科都察
院右都御史耀兵部右侍郎各 賜鏹幣諸臣各陞
賞有差卞時雍前歿于軍中贈廕從優 恩至渥矣
是役也文武將吏實仰仗 皇威奏此膚功然其中

嘗為梗者三初潯梧叅將李鳳者病不任事也嫉東
人功從中齟齬已岑溪知縣徐一文嘗于六十三山
招撫十餘山矣恐害其成遂徧插旗山口書官兵不
得槩入賊遂有竄其中漏誅者既已上功矣而兵垣
復置疑諸戰功不必實駁停寢之凡遭齟齬有三云
先是督臣論罷鳳按臣論罷一文至是覆核諸戰功
盡實盡蒙甄錄三軍之士乃大悅

二十五年欽州四崗叛入安南總督侍郎陳大科討
定之

四尚者曰澌凜曰古森曰丫葛曰金勒尚凡四後更
 河洲羅浮思勒等名枕交南錯欽州故隸于中國累
 世黃姓主之至 宣廟議棄安南尚主黃金廣率衆
 叛入于黎及莫登庸篡黎以四尚來獻乞封 世廟
 許之詔收入版圖祗歲納欽州丁稅七十金羈縻之
 而已至萬曆年有上思州生負趙元壁者與黃爭尚
 田聚衆仇殺遂雄踞其地作亂前督府計擒之瘦死
 于獄而其子良臣猶擁家健見念圖報仇會黎維潭
 以復故國逐莫氏至欽州境上邊郡震恐而州官請

蠲良臣罪用其精兵以遏黎後稍稍有俘獲顧良臣
 素不善撫其衆既死于永烈幼以叔元奎代領其事
 愈益虐衆衆思亂矣則有莫氏故經畧使翁僉者乘
 間從萬寧州入聽尚民黃錫輩鼓煽嫁言為黎脩怨
 于趙也斲良臣棺而鞭其屍擄係其妻與子永烈去
 至授偽官造假印縱衆焚掠我防城諸處消息甚大
 挿界牌尚口標曰此黎朝地知州王世守上變且曰
 界牌越欽州一舍矣明日又告越十餘里矣督府大
 科下令此四尚我漢地也無論其挿牌于何處此不

可尺寸失之者也則以叅政王民順攝海北道事檄
副總兵黎國耀提精兵馳至欽州截殺之復檄左江
道副使楊寅秋詰問安南國爾維潭方欵關乞降何
乃縱翁貪輩擾我封疆得毋陽順而陰叛耶維潭頓
首稱 主臣小國實不知情謹唯命遂遣郡公逮翁
貪治之追出趙氏妻子送還欽州我兵益振于是河
洲澌凜等尚悔禍先乞招撫矣獨黃錫等懼罪大不
赦猶據思勒羅浮二尚不下則叅政密授計黎總兵
王知州出哥設伏卒擒黃錫與黃職黃先數渠魁寘
之法餘黨悉安插勿誅四尚乃平旋從尚民奪趙子
黃之請推其族人曰黃安黃恩者分主其尚蠲稅一
年給路資護送趙永烈母子還上思州下令班師分
別獎賞有差按 先朝樞臣議處莫氏疏內一曰四
尚我 祖宗金湯之地也應准其獻還不謂後五十
九年有翁貪輩之亂賴 朝庭之靈群策畢舉復還
定之金湯如故矣

外史氏禁曰五嶺多崇山絕巘深林叢箐群不
慄者嘯聚其間時出流劫累為民害其山猺種

類不一曰生徭曰熟徭曰僮人曰欵人曰伶人
曰獠人皆以獷悍而為名其所聚曰寨曰團曰
巢曰隘曰峒曰山皆依險峻而竊據詩稱蠻荆
為讎楚記云蠻與羅子共敗楚師殺其將屈瑕
後踰嶺居溪峒中時出信吠為梗周秦之疆理
不能及漢唐之經略不能威所從來逃矣

國初自申國公鄧鎮討平之後輒出沒以肆虐劉
征之則遁去之復還誅之則不可盡其黨類若
秋葉然隨掃隨有如陽春之西山德慶之羅旁

綠水清遠之扶羅二山尤切要害至如岑溪之
七山連結六十三山時出劫掠實為東粵藩籬
憂又如欽州之四崗久淪於夷豈稱駿業哉節仗
韓襄毅王文成諸名公討而定之近奉 制府
維揚陳公移東師以平岑蠻款交夷而復四崗
堂堂然大一統氣象孰有盛焉者謂非百世之
伐乎第其醜類日又蕃衍不可不嚴為之防也戴
巡按璟擇招主禁通徃之議似可採行霍文敏
公言誠得良有司訓諭鄉民十家為甲百家為

堡互相防守險要路徑立為寨堡鄉民互相守
護仍鄉立社學導之禮義此亦化盜為良之要
也又必做李崇之法每鄉要處設立排柵以便
防闌每村路口建置更樓以嚴把截樓上各置
器械鑼鏡賊小入則鳴鑼大入則放鏡更樓鑼
鏡一鳴則各鄉村鑼鏡齊發一面遣鄉兵揀援
一面截其歸路則各賊未有不為釜中之魚者
是在各地方文武官加意振飭之耳

海島澄波

洪武六年冬十二月廣陽指揮楊景討平海北諸盜
初壬子五月海賊李夫人鍾萬戶徐仙姑數於海晏
下川大儋文特等地劫掠景即同指揮范懷率舟師
勦捕至陽江海陵并上川驚惶門遇賊船二百艘擊
敗之斬偽總兵鍾福全李夫人賊衆一百七十人焚
其船雷州東海碓沙頭洋有海陵海晏賊船劫掠於
通明浦徐聞縣賊船出沒行劫景隨率舟師至斷頭
山遇賊船出洋督官軍追至速頭港與戰至那泥港
殺溺甚衆擒偽總兵陳貴等二十八人斬于軍前又

令雷州衛千戶王清等追捕逋賊羅已終於潘浦殺二百餘人於吳川縣東碭州獲賊首譚南受等三百八十五人於翁家港擒賊首梁許進又會海南官軍追已終於烏雷門略無踪跡頭目梅思等四十七人請降遂給榜文安撫居民而還或報已終迭往交趾楊璟即命王清同海南千戶周旺汪滿等捕之獲賊從黃三舍等五百八十三人又獲廉州府石頭昆城大廉賊沱三秀等四人隨據頭目李福等獲已終同夥叛首偽千戶蘇稱高等四人及雷州衛僉事朱宣武捕獲已終賊衆潰散并安南國雲屯海鎮經略使關報相同景乃率師還

天順二年海賊嚴啟盛寇香山東莞等處巡撫右僉都御史葉盛討平之

先是啟盛坐死囚漳州府越獄聚徒下海為患敵殺官軍拘留都指揮王雄至廣東復殺總督備倭都指揮杜信至是招引番船駕至香山沙尾外洋盛廉其實會同鎮守廣東左少監阮能巡按御史呂益命官軍駕大船衝之遂生擒啟盛餘黨悉平

大順二年十二月海寇平論功陞備倭都指揮張通按察司僉事謝懃及官軍各賞有差俱以斬獲海賊故也尋陞肇慶府同知饒秉鑑為本府知府秉鑑先以勦賊功陞從四品俸至是巡撫右僉都御史葉盛保其廉謹有為吏部具聞故有是 命時盛劾奏守備德慶都指揮同知白震數貪肆 上命巡按廣東御史白侃執問之代震者都指揮使徐寧坐視廣西賊流劫德慶盛復奏聞 上命降寧二級仍於德慶守備由是軍政肅然

天順四年海寇魏崇輝作亂僉事毛吉等討平之魏崇輝許萬七天順四年竊據海陽下嶺等村與程鄉山寇羅劉寧黃阿山聲勢相倚民罹其害僉事毛吉知縣陳爵奉 命討平

弘治中海寇蘇孟凱作亂潮州知府葉元玉討平之蘇孟凱饒平人弘治間聚衆山林至有千餘名因而劫掠海陽村落民罹其害者數年知府葉元玉討平正德二年海寇朱秉英作亂官軍滅之

丁卯年潮州上漳溪賊首朱秉英林傳聚衆劫掠大

埔縣鄉村燒毀神泉市奏 聞總督府檄胡僉事黃
指揮張知府等官征勦殄滅地方稍寧

正德五年海寇陳玉良等作亂安遠侯柳文討平之
賊首陳玉良梁世昌張仕錦等嘯聚山林程鄉縣義
化石窟等都擾害鄉邑總兵官安遠侯柳文討平

正德六年海寇李四仔等亂都御史林廷選討平之
賊首李四仔黃鏞張時旺嘯聚石窟義化松源等都
寇亂汀漳惠潮正德七年總督右都御史林廷選安
遠侯柳文總鎮太監潘忠等督兵討平

嘉靖十年春海賊黃秀山等亂提督兵部右侍郎燕
右僉都御史林富討平之

秀山與黎國璽皆東莞縣民乘船出海勾集潮惠雷
廉閩浙亡命屯據海洋妄自稱號東西二路沿海鄉
村居民商船屢被其害至是富等嚴督海道副使江
良材嶺南守巡左叅議王積副使楊濂嶺東分守右
叅議翁磐守備都指揮王蘭分守雷廉高肇左叅將
程鑒總督備倭都指揮陸桓調集兵船分道把截夾
攻俘斬首從二百餘名顆秀山等戮于市

十一年海賊許折桂等亂提督兵部左侍郎兼左僉都御史陶諧討平之

折桂與陳邦瑞曾本亮周廣等皆東莞等縣民先是從黃秀山等出海為盜秀山伏誅折桂等遞交陞執曾本亮等殺之而折桂等復回聚黨沿海剽掠拒敵官兵為患日熾至是諧等督責海道副使楊濂兵備僉事莫相統領官兵俘斬首從五十九名顆生擒周廣等戮于市而折桂乞降首送違禁器物船隻入官歸還脅從被虜一千七百餘衆

四十一年潮州饒埔賊張璉作亂提督兵部右侍郎兼右僉都御史張臬討平之

璉本饒平庫役因拒追逋聚衆為亂知縣林叢槐親往撫之為其拘留勢日張大陰與程鄉劇賊林朝曦等交相結約有僭擬之號流毒廣閩江西三省臬奏調土漢官兵七萬六千有司會同江閩二省官兵分五大哨以副總兵王寵參將鍾坤秀祝明門崇文張四維分統之參議馮臬謨僉事皇甫渙賀涇張冕監之斬級六千六百餘顆招降安插男婦一萬五千

粵大記 卷三
一百餘名口生擒璉磔于市饒埔悉平臬又用計順
勦海陽賊王伯宣程鄉賊林朝曦等各生磔之
四十三年潮州柘林海兵亂提督侍郎兼右僉御史
吳桂芳討平之

時倭寇久駐潮陽府藏不繼柘林防守海兵譚允傳
等以缺餉稱亂揚帆直抵廣城初猶以告糧為名省
中以軍門方有事倭寇在遠徑議發兵剿之大為所
敗於是各叛兵橫肆鈔掠省會戒嚴桂芳聞變陽布
令招之隨調東莞南頭九舖水兵自外洋入因躬督

副總兵湯克寬叅將門崇文水兵自惠陽趣東洲襲
海而出合擊之賊腹背受兵駭奔無措生擒六百一
十二人斬首不計已而餘黨復據大艦不解桂芳與
總兵俞大猷用計破之復生擒三百九十三人斬級
四十一顆首賊譚允傳盧君兆等先後磔于市其船
入官遺孽無存遠近稱快

是年冬潮揭林樟賊郭明等作亂總督都御史劉燾
討平之

將潮揭賊巢百藪而林樟為諸巢領袖郭明為諸賊

崇魁依海賊陳一義為外藩盤根固蒂殆二十年攻
圍破寨劫虜焚殺不啻千百奪占田地民庶哀籲已
極乃行潮州兵備僉事楊芷監軍副使江一麟總兵
郭成分兵追剿賊首郭明領衆以拒官兵陣擊郭明
斬之及其從賊一百餘顆餘黨匿入深山閉圍拒敵
兵焚其巢仍移師北山洋馬湖二寨首惡胡一化陳
一義拚命抵敵官兵奮戰擒斬賊二總李自新等首
從共五百四十餘名顆牛馬五百餘隻俘奪賊屬被
虜男女一千二百餘名口士民歡呼同舉手加額曰
繼世劇賊一旦蕩平自此得安枕矣

六年冬海賊鄭大漢許俊美久作亂提督兵部右侍
郎殷正茂討平之

先是鄭大漢者糾衆操舟流毒海濱春間乘倭警與
楊老仔等縱橫於瓊崖地方為禍益烈入夏倭患告
平大漢始開洋東上避兵吳川陽江一帶所至大遭
荼毒督府下令海道副使劉穩授計征倭海兵把總
吳天賞原任都指揮金丹督率撫兵追至樓肚澳連
戰數合賊船有衝沉焚毀者溺死不計賊勢窮蹙棄

奔山督兵圍搜擒斬凡一百三十餘名顆許俊美者
原係林容漏刃之黨多年在海猖獗高雷兩府之地蚕
食殆遍時出沒於陽電之間併督天賞等兵追之夏
末為颶風壞船俊美率衆遯上吳川一帶劫虜復檄
劉穩整兵付叅將白翰紀往援行次廣海又為颶風
壞船本賊突入馬頭嘴等處肆劫內地訖然督府震
怒屬劉穩暨監軍副使吳一介將章程新脩三寨船
隻募兵二千委叅將吳繼芳領之出勦令劉穩登舟
調度仍促白翰紀吳天賞等舟師東上夾攻一時新
兵倏集士氣奮揚白翰紀初戰于竹洲老萬山晏繼
芳再戰於三竈洋吳天賞等兩捷於三洲洋荔枝灣
俘斬三百名顆焚燒溺死者倍之許俊美為夥黨相
戕止存屍軀餘黨無遺鄭大漢為吳天賞生縛解軍
門身長八尺磔于市

萬曆二年春潮州叛賊朱良寶又作亂提督兵部侍
郎右都御史殷正茂討平之

潮地自嘉靖壬子以來倭奴海賊縱橫殘破為甚良
寶與逃夷林道乾及改行魏朝義莫應數各先後糾

黨出海其為禍最慘者則林朱也官府苦於地方多
事兵力不暇唯其告招招之後朱據南洋寨林據華
林寨魏住大家井莫住東湖寨林朱則報水殺人如
故民甚苦之然不敢聲其寃蓋懼二酋聞聲則喪身
滅門之禍不旋踵至者正茂初莅鎮即謀造戰船待
時大舉以伸人神之憤萬曆元年春山寇蕩平議乘
勝搗之林朱偵伺林徑投往夷寨朱西走陽江犯城
為官兵敵退舟師襲殺遂奔歸南洋深溝高塹固壘
死守水陸官兵環而攻者近萬謂涸轍之鮒旬日當

下矣不數日副總兵李誠立被賊衝營失事報至時
督府憤之趣總兵張元勳往焉張請益浙兵增置器
甲及凡軍需皆如議督府詰長樂視師重申賞罰三
軍聞命莫不感憤誓死直前遂斬伐樹木周圍列柵
環匝賊巢造戰車敵樓取柴草實其溝塹以便進兵
百爾具備於三月初十日八面進攻一鼓破巢凡俘
斬一千二百五十名顆良寶死刃下男婦不計此舉
也衆議慮其巢堅難下兵臨之日大書榜文有投降
者免死半月之間無一應者皆髡髮以徇至死猶鬪

議者謂田橫之客不是過也故千二百人駢首就戮
無一遺漏者軍威益振魏朝義莫應敷因之皆相率
毀巢散黨投官請命二院會議釋之

外史氏棊曰海寇爲吾粵患自古記之矣考之
漢書安帝永初三年秋七月海賊張伯路等寇
略沿邊九郡遣侍御史龐雄討破之此用兵靖
海寇之始自後時常出沒唐天寶中有吳令光
之亂宋紹興中有黎盛之亂旋爲官軍破滅莫
究其顛末已入我

皇明申飭海防綦詳且密而海波沸揚鯨鯢嘯聚旋
討旋發未有晏然享數十年之安者是故洪武
初年海北盜發指揮楊景討平之十四年海寇突
入潮揭邑人蕭子明討平之景泰初則杜信死
海豐之難徐寧坐流劫之罰海上肅然乃開府
其地者先後振紀嚴防伸威耀武隨有竊發即
行戡定百粵賴以救寧則皆諸名公之烈也說者
謂兵法毋恃其不來恃吾有以待之是故防海有四
要焉一曰嚴法令海防官兵非不綦布星列然

玩法坐視衆謂宜定以限防嚴以法守賊入其
界即罪不少宥庶人心知畏懼而海島可澄清
矣二曰密保甲蓋禦盜安民莫要于保甲之法
宜於沿海邊民使相聯絡十家為甲十甲為保
各簡練兵勇精明器械把截海口毋令賊得入
境遠者罪罔輕恕則控握攸嚴而強梁不敢犯
矣三曰杜窩濟蓋海寇能鳴張者以濱海居民
為之窩藏得容其奸也又從而為之接濟或載
魚米與之貿易或通消息為之鄉導宜嚴禁諭
有故犯者罪之此亦可剪海寇之羽翼也四曰
明信地近議建六水寨給與船器專備追擊而
以副總兵統之計殊周矣然沿海信地宜亟申
明使各嚴把守遇冬春收汛之期務遵原定
會哨之法庶責守攸明賞罰可信矣防海之法
似不出此籌而行焉粵民其尚有瘳哉

言

分不出其善而林則其尚亦甚也

合而之則其責于斯則實謂何計多切也

如對各款味中出本春外則之也

如歸歸其然之情則因是然則則計以宜也

山新取六水蒸合與

亦其之其亦可矣

